


主
津
新
集

卷
參

15

1232

3



門和20
號128
卷3

門15
號1232
卷3

說僻癸巳正月見萬國公報

僻者。任性乖張。負氣偏邪之謂也。譬之處城中者。論出東門。必由東街。彼僻者。亦知行此為是。奈言非己出。乃故造向西邊徑之說。示人亦出東門之一道也。又或引經論道。謂出必由戶。彼又不遵師。不則法。偏作攀牆踰垣伎倆。以惑出者。不必皆由其戶。此不過借端喻僻。其實種種行為。總期執偏行怪。以恣其矯矜自用之情。至違公忤眾。冒險蹈艱。皆所不恤。猶之公孫龍。劈孔穿。白馬非馬之辨。輒引尹文諷齊。取士非士之證。大抵此等魔病。不但下愚無知。年輕氣盛者蹈之。若夫位高權烈。鴻儒碩學。亦在所不免。行此之吃虧者。小則勞神損德。惹禍招尤。大則破家蕩產。傾社稷喪天

三律斤集卷參

下。敗名殉身。遺臭萬世。斯紂之殷鑑。孟子譏其爲天下戮者。是僻之爲害。不綦烈哉。夫孟子之所謂天下者。乃家天下。官天下。一人一國之私天下也。非今之聯五洲並二極。日月所照。霜露所墜。舟車所至。人力所通。萬國億類之公天下也。是則古之戒僻防僻甚易。今之戒僻防僻則極難。何則。古之犯僻之小者。但慮衆人之懲。犯僻之大者。亦止慮舉國之誅。今則不然。蓋今之所謂僻者。要質諸天下之公。是公非爲準繩。即使一國相率沿效。習風成俗。因俗爲教。因教爲治。初未有不自私其教化政治。爲臻善至美。及至世界畢開。海天爲市。萬國咸集。兆類交錯。當斯之日。雖相形見異。但無一國不自認其非。而更自炫。以謂人非我是。人爲異族。我爲

正教。苟使其情願同吾是非。服我政教。然又側目視之。總不許其爲世界上之人類。及至因端齟齬。又不揣情度理。衡時量勢。動輒又欲與人競文鬪武。稱干比戈。無何事機敗露。因戕致痛。又不知療病治原。而徒事亡羊補牢。以冀背城借一。斯誠天下之大僻者。而不爲萬國所共戮者能乎。此所以印度。安南。錫金。緬甸。與夫非墨兩洲。羣洋列島。傾社稷。覆邦家。猶罔然如在夢中。誤謂勢力不敵。弱肉強食。循環固然也。而獨不知。皆由其教化幽僻。政治乖張。邪正難爭。天實使之也。諺曰。獸鬪穴。鳥競巢。物類至愚。猶知護衛其棲止。矧而人爲萬物之靈。孰不爲父母坟墓之邦以爭乎。所不然者。皆由國無天道之學。人失誠懇之志。加之視成法如太山。當

廉恥爲細事。一遇大局變故。則諉言四海兄弟。天下一家。朝秦暮楚。等諸傳璽。此所以今之國破君亡。綱令爲他人擅者。不但情願馴死他人胯下。甚又大言諱謂原吾風俗。仍吾服制。政令雖失。土地依然。祖宗教化。未嘗或廢也。噫。若而人。眞所謂愚不可及者。以其不自知。其所以破國亡家。供奉他族爲君父者。適洽其僻於祖宗教化之成法耳。若中華。則不然。因我國崇尚儒術。孔子曾言。後生可畏。又曰。三人同行。必有我師。擇其善者而從之。其不善者而改之。是其教人。不必拘泥。祖宗成法之明徵。所可惜者。祇爭於善不善。三字之難別。如天下萬國。所同欽宗倚賴。之有明驗者。幾皆曰。耶穌教化。爲臻善至美之天道。獨我中國。則嫉之。爲至不善之

異端。天下萬國所同非者。幾皆曰。礮艦軍火。爲至不仁。而獨我中國。又嘖嘖稱羨。以爲至善之兵器。所以西人之賠錢宣教化者。到處人爭逐之。西人之懷利售軍火者。到處人爭趨之。以謂苟有此。則富强可立致也。獨不知。軍火由於技藝。而富强則出於政治。政治則由於教化。所以子輿氏曰。善政不如善教。苟不能法善教。更善政。以致誠慤之士。雖有堆山之礮。鎮海之舟。物不能具有神通。以護國也。苟能法善教。更善政。致慤爲士。樹志爲城。即無礮艦軍火。又孰忍馘人之罄國。君人之曠土哉。孟子又曰。不揣其本。而齊其末。方寸之木。可使高於岑樓。今若僻棄天下之所同善者。而樂取萬國之所共不善者。又何異於覆其岑樓。而拾其寸木。苟使孔

孟復生。我知其必不以行是爲非僻也。中國爲聲名文物之邦。都人士。通經達權。廉恥極重。名器猶尊。故凡關於顯祖榮宗之善舉。靡不竭力推求。爭先恐後。今者。事爲舉國榮辱。變通一道。我知其將不止於至不仁之軍火。若夫關繫廢興存亡。耶穌救世。光明正大之天道。必能敬恭接納。以迓天和。斷不至讓人有美獨擅。情願固執邪僻。縱民效逆事佛背天。自蹈於災殃禍害之故轍。而亦不至於效印度。安南。諸邦。之破國亡家者。居恒則居命自炫。謂皆數千年之古國也。臨變則又求尺止寸。棄長取短。及至機失時過。綱墜籍移。乃徒喚奈何其天也。我知祖宗即愚。成法即陋。教化即鄙。又孰肯任其子孫。抵死不變之干咎哉。鑑觀往事。夫然後知古今

來之拘泥固執者。莫不自信其古人之聖。政教之善。鬼神之靈。及至較之盛衰存亡之明徵。而後知優劣。純疵。邪正。與人不敵之效驗。湯之盤銘曰。苟日新。日日新。又日新。斯言雖畧。亦足爲拘迂者誠。夫新者。故之反也。亦是非借喻之虛字也。不言是而言新。加又日日。反覆叮嚀。則所以勉人逢時權變。毋或稍執昨日既是。則不可革爲今日之非。今日既非。則不可鼎爲明日之是。蓋事非辨不見理。物非形不見絀。往者已矣。來者可追。固當勉勵趁時。以隨機應變。然後人得爲無忝之誠懇。仕得爲有用之經濟。所以康誥曰。作新民。詩曰。其命惟新。若必悠悠然。固守混沌初開。與鹿豕遊之故態。期與千萬年後。日新可畏之後生。折衝於無形。戰勝於不兵。

又能得乎。

底事癸巳二月見萬國公報

題爲底事。自然駭爲奇文。天下事。滔滔絮絮。言不了。說不盡。何必以無端無緒之底事。編爲駭人聽聞之奇事。所以然者。取其能作來驚夢裡閒。且有說與傍人渾不解之義。是則今日之要緊事。危險事。天下事。國家事。自我言之。則爲私事。衆人非之。則爲多事。衆人是之。則爲公事。不幸而再秘之。則爲悞事。幸而同聲疾呼。而播揚之。則爲當頭棒喝。救世之大事。蓋天下事。無事不牽制。無事一觸。則生有事。小事不了。則成大事。內事不靖。則牽外事。外事不理。則累內事。底事不言。則成隱事。隱事不發。則釀禍事。禍事去了。則成恨事。恨事過了。則成故事。是則今日中外交涉。鬧不了。割不開。

之一大事。今日不言。明日不行。則變爲將來一大憾事。或曰。子休矣。通商具有約章。交際訂在明文。會盟朝覲。出自誠謹。貿遷交易。歸於孚信。善後以來。兩無虞詐。雖此間有鬧教燬堂之習。彼處不免下令逐客之沿。是皆出於風俗民情。當道惟有各爲彈壓調劑。自然相安無事。何嘗有絕大奇事。足累子之繁言哉。曰。有是哉。子之所辨者。則余之所謂底事也。天下之底事多矣。既往者。考之經史子書。幾如恒河沙數。而未來之將發者。又安能更僕以待。三代幽遠。姑勿論矣。惟舉其彰明較著。約畧言之。自桀紂幽厲。降至秦漢以後。其間數千年。此中之上下君臣。相繼失機。破國滅身者。掃史彙錄。不免洛陽紙貴。使若而人復起。責問其前事。彼豈願聞哉。

以其不願聞。則是其遺臭萬世之底事。往者不咎。來者可追。今之所謂底事者。亦復多矣。舍緩就急而言。如通商一局。在俗眼觀之。總謂貿易傳教尋常二事。在識者觀之。其危甚於壘卵之險事。蓋貿易者。盡人而忽其爲。以有易無。無關切要。傳教者。亦盡人而忽其各有各教。隨人樂從。無關痛癢。而獨不知天下之禍機。皆起於所忽之中。故自海禁大開以來。但恨財乏。不慮物之無從羅置。始而疋頭洋貨。繼而礮艦軍械。任意携取。隨手搬運。至於藝術也。並且開誠授受。盡心傳習。在吾人私心自滿。以謂人愚吾智。固能借矛刺盾。於是傾箱倒篋。取效務盡。而獨最關切之教事。則棄視如西子之蒙不潔。必欲驅除而淨盡。是則中華一極大隱憂之底事。

也。在吾人猶不知黃梁夢境。好事皆幻。在西人則明如觀火。祇因利之所在。取好以投。至關切盛衰。牽繫富強之堂奧。則反爲隨機隱秘。或曰。子嘗言商教並行。何西人政府。遇商務則催之案前。見教事則置之腦後。且隨在總以軍藝求售於吾國。不亦徒託傳教爲空言乎。則應之曰。比之離婁。則教事如規矩。軍藝若方員。較之師曠。則教事如六律。軍藝若五音。喻之際遇。則教事如孔明。軍藝若魏延。蓋孔明一死。則魏延終身不爲漢用矣。人雖至愚。猶知計謀衣食。彼西人者。巧奪天功。智慮入神。駕數葉之危舟。涉萬里之重洋。方且到處跨州駢國。又安肯愚至售兵賣藝。爲戕己焚身之計。所以然者。明知軍藝之不吾恃者。在棄其政教。蓋失此政教。以

培育輔佐。雖有堆山積海之軍火。安能別具神通以護國哉。今欲棄其政教。從事其軍藝。何異滅其規矩。習其方員。廢其六律。調其五音。猶之殺孔明。而求魏延之必爲漢用。是速其叛亡也。又安望其能與人駢駕而驅。期於一日下令逐客哉。竊謂四海兄弟。天下一家。令不必下也。苟能稍行其政教。料其必善顏相待也。半行其政教。料其必收拾其戎行也。全行其政教。料其必盡撤其兵艦也。中華地廣物阜。戶口甲於五洲。政教旣純。天助人靈。軍藝隨機可轉。製造轉眼立致。資用之餘。盡可銷運出口。繼絕舉廢。隨意縱橫。又奚止自固疆圉已也。雖曰。談何易易。然勢之使行者天也。不出乎此。必出乎彼。豈我能以意料逆之。此無他。因言底事。而類及之。

在前人立法既失。非前人之罪也。此一時。彼一時。今人不可底於誤也。詩書禮樂非不美也。宜於古不宜於今也。今日者。時遷勢徙。有生之大變局。雲泥之相去也。起古之賢聖。質之以時事。吾知其未有不謂當變也。何必人而固執。且有說也。歷古之失天下者。孰不抱詩書禮樂以殉國乎。得天下者。又孰先懷詩書禮樂以建基乎。由是觀之。治天下者。未必皆因詩書禮樂。而亂天下者。又何嘗不爲詩書禮樂。是詩書禮樂。可秦可楚。毋爲父母墳墓計也。今欲謀富強。以爭榮顯。必暫擱詩書禮樂。從事父母坟墓邦國。天下之爲治者。隨在皆有詩書禮樂。惟是物雖相形。然後見絀。無奈司空見慣。總嗤他人爲鄭聲。眩自己爲雅樂。苟能心平氣順。傾耳細聽。

便知他人之操者。未必皆爲鄭聲。己之自調者。亦未必皆爲雅樂。世間事。無外榮辱利害。利與榮者。權貴富裕也。害與辱者。困厄貧窮也。苟有道示人之趨向。孰不速棄困厄貧窮之成法。競趨權貴富裕之捷徑。况今之行舊者。且人人如此。又焉患乎。將來之效新者。不人人若彼。責成天下者。勢如閃電。智若懸河。豈待登軍門者之獻策哉。不行則已。行則急先沿海。漸而腹地。明興西學。陰襄教事。一人受意。萬人投好。庫匱可貸。才短可借。取士依古。殿藝兼新。題必盛衰榮辱。文重父母墳墓。十數年可操樞密。二十年可握疆寄。三十年可掌司道。四十年可總州縣。誠如是。則無仕不知爲變通來者。於是乎。下令行權。有善必行。無非不革。私率其俗。公依政

令五十年。則大有可觀。不百年中。可稱強盛。當斯之日。民盡誠。士皆精靈。不矯不矜。失地可復。無貪無婪。萬國咸畏。此所謂蟬蛻有暫。天衣無縫。又何至於亂哉。斯乃變通之大綱領也。若夫眼前言路應開。報館宜設。鐵路當行。洋藥宜禁。利權應舉。要在開誠布告。因利善導。隨機緩急。務底於成。若曰碍風水者。何妨易之以禁地。害民生者。何妨派之以餘利。天下事。苟能克己待人。視合國如一家。待百姓如手足。又焉患乎事不可爲哉。居今之世。所關乎國之盛衰者。大要有四。養民。安民。新民。教民。是也。然必四者並行。始克蒸蒸日上。否則缺其一端。亡也忽焉。譬諸良馬。不幸而折其一足。其能駕馭者。幾希。右篇歷叙政教。

四者兼包。孤詣苦心。真堪起敬。惟中幅言及外國政體。以爲貨之出入。稅有輕重之不同。因欲阻人之不來。使吾得專擅其利。愚以爲各鄉土產。理宜流通。彼貨運至此處。可擇價之廉於我者購之。此貨運至彼處。亦可求善價而沽之。一出一入。兩受其益。列國通商。胥是道也。又言西人傳教。故秘其富強之堂奧。愚以爲各處設立書院。悉聽華人學習。毫無吝心。又言中華一日不利。則英之商利盡去。愚以爲英之通商。不止一國。查萬國通商全書。英與歐洲各國貿易。百分中四十二分有奇。與美國貿易百分中十八分有奇。與中國日本兩國貿易。百分中二分七厘。故於說之似有小異者。姑從闕疑之例。暫爲割愛。尙幸前後

聯爲一氣。尙無接續之痕。異日鷺江先生。廣搜西事。博覽西書。識中西交涉之大端。爲確切不移之至論。則本館所仰望者也。

本館謹識

底事被謫書後是篇癸巳夏間寄萬國公報未獲賞刊

日者海外逸人惠顧。莞爾笑曰。子亦有今日之辱耶。斯固料之有素矣。南人不宜騎馬。北人可以兼舟。子有其一焉。敢請爲子修函。分辨可乎。應之曰。鄙人久已無意涉世。祇因山雅谷先生。觸動舊事。初以謂學譜畫蛇。爲寂寞逍遣。不圖見者悞爲蛟龍墜地。非別鱗折骨。將恐災害並至。稿旣見遺。忌且當路。筆墨遊戲。何堪乞憐。不然。生平所憾者。患人之不已辨。不憾己之潦倒。子姑措詞一試。惟是時事愈遷。是非愈明。許多昔之所謂荒郊斷瓦者。今且化爲合璧連城。又焉知今之所謂傾筐之芥子者。不更爲將來棲鳥之喬木。慎未可以滿懷恨氣。兩套成典。斷盡造化未露精蘊即可。旣

而逸人興作。拈筆宣書曰。日昨得接貴館公報。第五十冊。展悉鄙論藉刊。諸荷獎誨。感愧莫鳴。所可悵者。當時僛促附郵。原稿遺失。莫從自質修省爲憾。再四追思。雖自悔信口開河。取厭時忌。然而反覆默想。終不知礙道迷途。咎歸何處。僕也。行將就木。志灰於世。所以冒昧著述。震飄擊樹。無他慨天道之滯行。歎人事之欠盡。外此夫復何希之有。其所以篇長論瑣。自信未違叮嚀示人之意。竊維牽車服賈。以布易粟。爲天下至道。僕卽不敏。將不至忘饑以食。又奚至立論阻人不來。使吾得專擅其利。幸而身爲華氓。卽有其說。而亦不背同舟望濟之義。旣曰交涉之大端。爲不移之確論。似當兩無厚薄。方見公道爲交。若然者。又何必稅餉之定章。各私其

輕出而重入。豈非西人已有阻人不來之明徵乎。人心百出。法不禁利。居恒尙思不耕而食。其於待沽而得者。又安肯舍廉以就貴。况書生之論。未有言出而事應者。防患若此。殊無謂也。天下事。總在能處己者。而後能致人。僕雖不智。猶自云資用有餘。盡可銷運出口。又何至鹵莽立意。阻人不來。豈非貴館誣蔑之甚乎。其或文意近似於阻人之不來。而於勸語也。亦當用似。以符其原文之本然。胡可妄用因字。以實其非之到底。若論與國交際之大端。宜取痛癢有關之最著。是則今日之欲言交涉者。舍英而誰可指乎。事在中華。言在中華。則商利所指亦在中華。何涉於英與他國之商利哉。旦夕禍福。牽制靡常。英若恒有恃而無恤。安見其爲利哉。孔

子曰。先進於禮樂。野人也。後進於禮樂。君子也。如用之。則吾從先進。由此觀之。是君子之不若野人者遠矣。英本野人也。如英一旦而妄想爲君子。則不待中之不利。亦難保其能恒擅萬國之商利也。中華原爲君子也。苟能處心積慮。而若野人者。則不必英盡遺其商利。而吾亦可轉擅他人之商利也。自盛衰觀之。夫然後知君子野人。相去之效驗。須知孔子所以取野人者。以其性率天真也。所以棄君子者。因其驕矜自命也。中西廢興之由判者。其在乎野人虛心。君子自用。試以現事譬之。中華如一副待觸之新機。欲其駛者。必觸之正。則程坦而道長。觸之反。則途欹而道促。長可持久。促則易竭。僕所以言者。欲觸之者。觸其正。以持長不竭。若英猶一

長袖善舞者。富貴而多子。多才又善藝。僕之所以言者。欲其見機而知足。示人善舞之方略。善舞者政也。方略者教也。斯所謂富強之堂奧也。今日者。英欲中變通防鄰。以固其商利。日以軍藝從事。而不動之以政教。是觸其偏者。此所以僕借言西人秘堂奧之立意也。如謂僕言西人傳教。故秘其富強堂奧。是耶非耶。卽有其言。亦非憑空捏造。蓋君政之國。令在上行下效。責成傳教者。要以教關富強。略示瑟歌於政府。方謂不辱使命。無忝鄰誼。若必了無一言道破。徒以齊東野語。諺天道謂勸善具文。陷人悞至理爲異端。一任窘逐摧殘。藉以興戎要挾。何異爲阱於教。而害甚於秘。格致書院初設。聖經迴避。豈非秘而又秘者乎。竟又曰。異日鷺江先生。

廣搜西事。博覽西書。識中西交涉大端。爲確切不移之至論。云云。語意相敲。虛衷默詆。是鄙僕必待學。然後可與道交際。噫嘻。諱忌若此。衡文若彼。倘所謂廣開言路。果如是乎。且夫學有所專。才難求備。主稿來自西國。口誦西書。身歷西事。假欲試求其躬爲西書中之西事。我知其未必皆能也。誠如是。使僕於西事西書。搜覽而兼盡之。如仍食墨不化。能有補於交涉之至論。而無負貴館一翻之盛誨乎。惜乎中幅全段。專爲英國底事寫照。於美國公報。無所牽涉。公道在人。君子不黨。豈可以身爲英人。則諱論英事。使僕置身處地。尤在舍說僻之譯。而從底事之文。昇爲中英計者。有所觸感聯備。庶乎閱覽不生。英利可長。是底事之論。益中小而裨英大

矣。今若截去其中幅。僅刊其首尾。萬一其響如應。能不使英國家長抱恨哉。是則所謂割愛者。誠不謬也。僕生而爲窮家子。長而爲滄海客。今逾不惑。又作嫁依人。自念當日讀未盡白文。識不了一丁。今能效犬吠日。胡知其非聖神憑石開口。用羞天下之剛愎不道者乎。天地之大。萬物之備。人且不能無憾。况流弊旣深。大局堪虞。欲作中流砥柱。以挽旣倒狂瀾。豈一家言。兩隻手。可能弭縫補救哉。鄙諺曰。欲正人者。必先勵己。貴報中多少慢舊誨迷。斷詞缺義。於養利新教。毫無關切之作。且見賞微刊。而於旣許之孤詣苦心。四事兼備之文。又不能幸容其全豹。平心而論。公道徒然。大抵文字避時。作者間嘗聲東擊西。寓言寄意。要在當局者。虛心言外

求之。則隨在皆有奧義。若必志高氣昂。驕矜自命。但知一人爲大。不知一大爲天。乃至臨文不但點讀透句。悞魯爲魚。且其順文直解。尤指鹿爲馬。又安望其能言外求意。如孔書所謂內無恒產。卽墨書所謂內續奚吾。解者至是。仍註四字未詳。則其於他項註解。概可想見矣。哀哉。書山墨海。詞意蛟龍。華人於華書。尙不能窮知極識。主稿雖聰明敏慧。未免忝爲半路出家。又安能澈知畢解。今日之事。名謂援鄰脫厄。實爲體天宣道。當此廣學會始。所願同好諸公。泯去畛域舊念。滌來物我新心。凡有著述問世。莫論策論詩歌。寓言卽事。無拘古體時格。不棄淡樸華麗。總期順天闡道。鼓勵風化。簡明易悉。雅俗同聆。庶乎不違公報立命。廣學標意。是僕之

所仰望而終身者。逸人措詞如斯。自正面讀去。未免滿篇荆棘。從反面窺之。更有頭頭是道。字字金石。時適廣學發紉。尤冀後之述者。仿此觸目警心之作。其有神於世道人心。豈淺鮮哉。何妨刊之冊末。以見忠恕之不離於道者。主稿誠有矣。

天地人說癸巳五月見萬國公報
孟子云。人之患。在好爲人師。是師之爲言大矣。道德所關。教化所繫。治亂興衰。養生喪死。莫不束身待教。然則何以爲教。利害死生。關於善惡邪正。教者。教人趨善尙正。遠惡避邪。蓋善正利人之生。惡邪致人於死。人孰不好生而惡死。其若外誘所動。不免踏於禍害死亡之機。上古民頑。相沿殘殺。惻隱者起而立言設教。徵而驗之。人得相生相養。無復爭奪殘殺之患。於是相率而頌曰。通儒也。賢士也。豪傑也。聖人也。是師之爲義。貴在教化。教化所施由於知識。人生有稟賦。賢愚由清濁。天資無定質。知覺反後先。所以子夏曰。夫子賢於堯舜遠矣。孔子知物以類推。理以情度。後覺益窮其

天地人說癸巳五月見萬國公報

孟子云。人之患。在好爲人師。是師之爲言大矣。道德所關。教化所繫。治亂興衰。養生喪死。莫不束身待教。然則何以爲教。利害死生。關於善惡邪正。教者。教人趨善尙正。遠惡避邪。蓋善正利人之生。惡邪致人於死。人孰不好生而惡死。其若外誘所動。不免踏於禍害死亡之機。上古民頑。相沿殘殺。惻隱者起而立言設教。徵而驗之。人得相生相養。無復爭奪殘殺之患。於是相率而頌曰。通儒也。賢士也。豪傑也。聖人也。是師之爲義。貴在教化。教化所施由於知識。人生有稟賦。賢愚由清濁。天資無定質。知覺反後先。所以子夏曰。夫子賢於堯舜遠矣。孔子知物以類推。理以情度。後覺益窮其

知。自然高出先知之上。故曰後生可畏。是免後覺者。無或稍爲先知之阻。然後能求物理止於至善。由是觀之。益信先知之見。將不及後覺之明。墨書有謂楚將伐宋。以公輸盤作爲雲梯之械。墨子聞而兼程說之。楚王雖諾爲之罷。然將以梯械爲辭。墨子復見公輸盤。解帶爲城。以襟爲械。公輸盤九設攻城機變。墨子亦九拒公輸盤之攻。械盡而墨子守禦有餘。公輸盤之攻伐卒屈。而曰。吾知所以攻子矣。吾不言。墨子亦曰。吾知之所攻我。吾亦不言。夫物極則變。在墨子疑其必殺己以絕宋之守禦。而不知因知益窮。九失之後。終有一得之精。可見學問無他。求其放心。而是非之理。亦無他。去其泥臆。若曰。聖人之道窮且極矣。無須他求。我則曰未也。宇

宙之大。事理之繁。非但賢聖不能周知畢識。而並百家諸子。亦不能道其萬一耳。卽如天地人三者。淺而易明。人猶不能定其尊卑序次。其他造物神妙。更不必言矣。夫天地人三者。儒謂三才。然而求其三才爲義。始則曰。天生地養。人居覆載之中。是言天尊於地。地尊於人。天父地母。人爲三才至卑。繼而曰。贊天地化育。與天地參。是言天地人三者。敵體而並尊。終而曰。大哉聖人之道。洋洋乎。發育萬物。峻極於天。是言聖人尊於天也。其未貶及於地者。豈因其非地無以立足。非地無以貨殖乎。余雖不學無術。然按天之義。爲上古尊稱。見於詩書典籍審矣。若於諸子百家。雖人多見異。究無以人尊於天。發爲議論。乃子獨思再倡之。豈所謂因知益窮。先

儒雖云。天生。天予。天視。天聽。而後儒卒未見其果有生。予視聽之。驗。無徵弗信。意者。生。予視聽。聖人躬能自爲乎。或曰。子以天地人三者。謂淺而易明。又曰。人猶不能定其尊卑序次。豈人之所難。則子之所易乎。則應之曰。天之爲義大矣。毋須煩言。惟就稟賦測其以然。度其當然。欲言天者。必先從事於地。欲言地者。必先從事於人。欲言人者。必先從事於身。關尹子曰。天非自天。有爲天者。地非自地。有爲地者。譬之舟車屋宇。待人而成。以是觀之。人亦不能自人。必有爲人者。今以吾身自問奚自。必曰生之於母。再問之。必曰母生於其母。推而進之。必曰元始之祖母。復問祖母能自生乎。必曰有祖父媾合。然後能生。或再問始之祖父母又奚自。直者必曰

不知也。眩強者。乃造謂氣化而成。然而聞者。將以有生以來。無復見有氣化者。無徵弗信。必窮問其是氣也。又奚自而至。是必曰。臆度如斯。其實奧妙難知。茲苟許其人生自氣。試問成人之始。男女孰先。多寡其數。必曰不知也。儒書云。知之爲知之。不知爲不知。是知也。聖人且有不能。不知之憾。吾何人斯。何必強人之所不知。但生自稟賦。當竭盡靈性。以格物窮理。方無愧爲萬物之靈。且物既有待。人豈能無待。有待則知其亦成自造物明矣。成自造物。又豈能峻極於天。若曰人尊於天。雖化外夷狄。尤不敢發此妄論。大塊之上。凡有血氣而能言者。疾病所呼。冤抑所指。未嘗不以天爲赴。愬。况身生孔門。口誦儒經。雌黃其口。教人背天。果爾真知人生自

氣。何必孔子以未知生。焉知死。窮自諱乎。此蓋欲強人之所不能者。故作欺人惑世。以爲掩耳盜鈴。按理而論。元始當有造物者。始而從事天地萬物。萬物備。而後從事於人。蓋人之爲物也。不但上無覆不仰。下無載不立。且口必資食。無食則不生。以是可徵天地萬物。不但成於人類之先。而天地萬物人類。亦無一不成之於造物。或曰。旣云天地萬物人類。成於造物。何以當時不稱造物。而仍稱爲天。曰。此天非彼天也。雖然天之爲義。大上加一。藏有一大之義。上古人稀事簡。知識有限。目之所及者。高明遠大。呼之爲天。心之所思者。造物至尊。亦以天並稱。迨至後人知識漸開。察知名實相混。乃畧分高明遠大者爲穹蒼。造物至尊者爲化工。造化。造物

主宰。皇天上帝。諸如此稱。無非示人有天君。天帝之意。其若世久稱倦。俗人仍古以天混稱。要亦不失其有一大之義。吾人當知。造物旣成。天地萬物。而必造人。以治理享受者。是天之予人也。厚於萬物。意者。人當知所大報本反始。方不負造化莫大恩德。非然者。使造物不欲有人。而天地萬物不失其爲天地萬物也。使化工而欲廢天地萬物。人不能自爲人也。且天之予人也。亦有未嘗厚於地上萬物。無奈人不肯稍一致思。禽獸亦物也。有生必食。食而必死。死而必腐。人亦然也。是人之爲物。未嘗愈於禽獸也。禽獸有羽毛以自適。人非衣服不能禦寒。禽獸有爪牙以自衛。人非械噐不能保身。此乃造物獨厚於禽獸。雖然。造物亦以靈性稟賦於人。所

以人雖柔弱。既有必得之權。則不患乎其有所待。此蓋化工奧妙。使物物牽制。以入其範圍。或慮人將恃其智識。故作背逆侮慢。因於大塊之上。另造一種。似人非人之猩猩猿猴。效人作態。使人按物推類。知天之所以予吾獨厚者。是欲吾知所做懼寅畏。以敬事其無所不能。非然者。使天而奪人之稟賦靈性。以加禽獸。或飛。或跑。或捕。或噬。地上人類安能免爲血飲。而肉食者乎。且也。地有配天之形。人無配地之質。而又自詡。謂能贊天地化育。能與天地參。不亦謬乎。豈大塊之間。未嘗埋沒許多參天配地者哉。若謂贊天地化育。是言教民稼穡。使民以時。與天地參。是言造舟爲楫。築室製器。說禮演樂。使民得相生養。峻極於天者。乃儒者失言。所以苟

卿十二子之非。子思孟軻。不免罪在其中。余曰。儒者既云。有物有則。當知稼穡之本在穀。舟楫之本在木。禮之本在所稟。樂之本在所賦。人雖能樹藝禮樂。莫非造化稟賦。然亦不能舍五穀。而自爲稼穡。棄稟賦而能爲禮樂。地上治生之道。物物皆能。何必人而自小哉。蛛結網以謀生。蠶作繭以禦侮。蜂築巢以爲國。是皆稟賦也。必人而以稼穡。樹藝。禮樂。教化。而曰贊。曰參。曰峻極。是蛛蠶虫介之類。亦可曰。吾亦猶是也。平心而論。以蛛蠶之知靈。曰贊參峻極。似乎較近於理。蓋人必待物。待師。而後有所樹藝。蛛蠶具有絲綸。不待外物。不師賢哲。有生自能張羅布置。此不過因人自小。連累及之。不然。大塊之上。莫論動植飛潛。焉有不待上帝造化培育。而

能成立者乎。若曰。能爲稼穡樹藝。宮室舟車。陶冶械器。禮樂教化。則謂賢聖。今者四極之寬。五洲之大。若而人之格致製造。精巧幾奪天功。豈不皆爲天神下降之者。而彼猶惕惕然。悚悚然。畏天敬天。視天如在其上。如在其左右。豈其能知所敬畏事天。而天亦獨厚其所稟賦乎。其視夫猩猩猿猴之不若者。能不吁嗟悲夫。故我不羨西人之藝術。而獨欽其能隨在。必遵耶穌以導人敬事上帝。

天賑癸巳九月見萬國公報

書曰。肆皇天弗尙。如彼流泉。無淪胥以亡。夫亡者死也。胥亡者滅也。滅也者。禍患災祲之由始也。所以聖人以神道設教者。禍福災祥。莫不以天引爲休咎。是則今之所謂災祲者。不論水旱兵災。蝗蝻火劫。統其害之較烈者。名曰天災。爲此言者。是所以徵旣災之今日。勉未災之將來。以儆夫世之作惡逆天者。知所警懼。當此時事多艱。災禍頻仍。畧知世道人情者。孰敢自外生成。不圖爲同父母坟墓者。籌一合舟同濟之善策哉。無奈或因關河修阻。或因力量偏限。遠水近火。杯水車薪。不免望洋興嘆。今者天使世界克通。精華萃於寰宇。聰明彌乎六合。凡百智識。幾並造化。何物災祲。奚

難設。法拯救。因是而論者紛起。或發議疏河。或興言築壩。或條陳截漕。或倡論儲倉。種種議論。終歸勸人賑濟。以爲及時上策。雖然情知同深饑溺。傾囊解助。踴躍輸將。中外不分。其若年來偏災之烈。幾於無歲靡有。無省無之。被災之處。或一連而數郡。或迤邐而數百十里。啼飢號寒。死亡相枕。慘目傷心。莫茲爲甚。如昨得席君勸賑山西捐冊。其文畧曰。嗚呼。天災流行。雖曰。國家代有。然從未有近歲之甚也。屈指二十年來。各省乞糴之書。迄無寧歲。好善之士。創爲義賑。潔己趨公。任勞任怨。勸賑之輩。幾至舌敝唇焦。勸賑之文。幾至墨乾筆禿。降至今日。久已勢成弩末矣。顧賑所之收欸。如是之星寥。瞻北地之災區。復如是之懸廣。蒼蒼者天。何不愛我

民之甚也。河南自鄭州決口。災民元氣已傷。去歲又被山水橫沖。民有其魚之歎。顛沛流離。直是雪上加霜。山東黃流怒發。濱河州縣。盡成澤國。老幼者。奔逃不及。鷙被水淹。少壯者。猛圖逃生。猝遭溺斃。水過人空。屍橫遍野。間有拚力而馳。雖慶重生。則已身無完膚。飢寒交迫。輾轉於荒郊瓦礫之中。亦將奄奄待斃。同時順直亦被水災。猶幸者。地近畿輔。撫綏賑濟。較齊豫爲易。蓋聖天子撥漕發帑。撫振災區。雖同一共沐皇仁。而順直較早。故談賑務者。皆以從速爲是。良由賑欸到早一日。卽早活多人之命。乃日前讀楊君光第。由晉來函。所述山西災區之廣。災情之慘。誠較齊豫順直爲尤烈。蓋山西自丁戊大祲。元氣剝喪。瘡痍未復。加以連歲歉收。農

民疾苦。已非一年。去歲始而亢旱。繼則霪雨。又繼以雹災。以致關外七廳。關內十餘州縣。竟皆籽粒無收。雜糧之價。昂增四倍。北方地瘠民貧。更值凶年。勢必商販裹足。數千里之人口。飢餓難堪。是以爭奪糠皮。禾梗。蕎花。草根。以啖之。卒至羅掘淨盡。繼以賣妻鬻女。以延殘喘。爲日既久。水盡山窮。甚至鬻割親生之子。以充飢者。去秋災民足有五十萬。現今死亡過半矣。沿途屍骸不可縷計。狼吞狗嚼。固屬觸目傷心。而且目下所剩之災黎。竟至爭食死人之肉。以致面目浮腫。不成人形。少壯者一跌而不能起。哭而無淚。號而無聲。此皆楊君目擊實情也。嗚呼哀哉。若再延數月。不將使晉省邊氓。盡填溝壑耶。云云。讀竟竊歎天災雖未有艾。惟人事經營。

可謂無微不至矣。惜乎通場打算。總在竭人事以聽天。苟能稍撥幾分精神。於經書上打一回照。間或有可挽回天心。以補人事之不迫者。未始不可兼而行之。是則余所以寓意於天賑者。其在破邪俗。行正道。格天心。補人力。蓋人賑難而有限。天賑易而無疆。天下事。是非不能兩存。邪正難於並立。所謂神道設教。見諸典籍者。書不勝載。畧舉一二徵之。如順天存。逆天亡。獲罪於天。無所爲禱。諸如此類。難以數計。謂此爲虛。經書可廢也。謂此爲實。天道宜講也。今者厥怒維殷。不可不察其何由。遽赫斯怒。早圖修省鼎革。以迓太和。雖然不必期其變雨雹爲雨粟。化蝗蝻爲棉衣。要能善後風調雨順。國泰民安。捐裁賑撤。養生送死。可謂無憾矣。若必抵死

不以天心爲周旋。徒恃人力。從事弭補。以待天之俯首悔禍。是終藐天之無靈。誠若此。則所謂神道設教。不亦託諸空言乎。萬一天而有靈。又孰必不其厥怒維增。厥災維遍。若然者。是則今日之賑人者。將來又將靠誰爲賑乎。席君謂天災代有。未若二十年來之甚。余謂此數是除海氛。髮稔回難。不計外。否則禍災之來。應自通商爲始。俗諺尙云。不知不罪。况上帝本有好生之德。安有刻薄而甚於禍古必輕。禍今宜重。豈非明言今人之獲罪。尤甚於古人哉。閉戶靜思。果爾災祲始自通商。則吾人益當勉想。五十年來。中外齟齬之案。有無關害神道設教。明知固拒之專條。夫然後知天道宜講者。其在乎統觀天下之爲教者。其間所繫之廢興存亡。是非

邪正。孰者因邪而衰滅。當革者勸民革之。孰有因正而強盛。宜因者誨民因之。漸移默化。庶乎天怒旣息。厥後克昌。或有以余爲迂者。余必告之曰。眼所不見皆爲迂也。天地創自迂者。萬物成乎迂者。人焉能無迂哉。要惟迂得其所迂。是無迂也。堯舜禹湯。文武周公。虛心教人敬天畏天。以事上帝。是其迂得其所迂者。昌黎自用斥佛。而不以正道示人之趨向。是欲教天下皆無迂也。祇因祭鱷爲階。示人自迂。而後世之從其迂者。幾乎無物不拜。又奚止老佛已也。嗚呼。佛始於天竺。今其國亦寥寥矣。豈非當日之爲佛者。迂不得其所迂。而禍遂至於斯矣。

此權上癸巳十一月見萬國公報
有兔蕙居士者。一日顧於守經子之廬。見案上申報。有廣之首章
之作。讀竟而嘆曰。今而後知世亦有欲爲鼠憂牛後之者。是將起
而著懸天括地之論者乎。余雖逐逐問舍。勞勞營窟。然嘗清夜運
想。幾回精神離舍。靈墟夢境。飄忽依稀。胎乎牛後先生。所謂放乎
六合之表。越乎五行之外。敢請畧洩染濡所及者。聊爲鼠憂氏一
哂。先生以謂可乎。守經子愁然而對曰。子休矣。吾知子又欲以政
教。說人之軍藝也。雖然子之見識未嘗不高也。子之謀慮未嘗不
周也。獨子之嗜談天道。亦未嘗不惹人之討厭也。蓋軍藝之事。義
可越俎。政教之體。理無代庖。處今之局。衡今之勢。若土耳其。亦一

比權上癸巳十一月見萬國公報

有兔蕙居士者。一日顧於守經子之廬。見案上申報。有廣之首章
之作。讀竟而嘆曰。今而後知世亦有欲爲鼠憂牛後之者。是將起
而著懸天括地之論者乎。余雖逐逐問舍。勞勞營窟。然嘗清夜運
想。幾回精神離舍。靈墟夢境。飄忽依稀。胎乎牛後先生。所謂放乎
六合之表。越乎五行之外。敢請畧洩染濡所及者。聊爲鼠憂氏一
哂。先生以謂可乎。守經子愁然而對曰。子休矣。吾知子又欲以政
教。說人之軍藝也。雖然子之見識未嘗不高也。子之謀慮未嘗不
周也。獨子之嗜談天道。亦未嘗不惹人之討厭也。蓋軍藝之事。義
可越俎。政教之體。理無代庖。處今之局。衡今之勢。若土耳其。亦一

幽僻之政教者。國處歐洲。政殊俗異。歐人每視同眼釘。孰意所謂眼釘者。猶能盤據獨立。縱橫隨意。豈非其勢之足以震懾列邦。惕服強鄰。安能逍遙自適。顧盼稱雄。不然者。叢爾彈丸。戶若晨星。庫若懸罄。西踞虎豹之國。東臨孔武之俄。南有黑海地中海之衝。北無長城金湯之固。間嘗構釁於俄。雖得列邦之助。究無一或涉其政教之者。何必英以是而預中哉。居士曰。先生真不愧。其爲守經之者。衡時若此。度勢若彼。能無混中華。與土耳其。同一局乎。夫土之於俄。猶卵之於石也。於列邦亦然。其能幸存。無爲諸國瓜分而肉食者。先是法皇拿破倫長驅伐俄。欲拓歐洲爲一統基業。旣而全師覆沒。列邦合從叛法。俄雖欲尋間西下。借詞報法。以窺歐之

弱小。奈勢必假途滅土。方能肆其蠶食之念。當是時。諸國甫立未固。震撼俄威。不得不以昔之合從叛法者。轉而聯法以拒俄。土雖得從約餘庇。然地當衝要。一旦歐俄釁生。則土之疆域。不免爲前敵戰場。此是土因歐虧者。其在扼黑海之咽喉。制俄舟之死命。雖然歐之列國。亦未嘗無裨於土也。萬一俄土齟齬。變起倉卒。諸國方且連兵濟餉。戮力衛土。以固歐之藩籬。勢有不待土之哭廷請援。又何暇顧及其政教之瑕疵。風俗之鄙陋。此是土藉歐而獲固。非其力能自全也。更有不盡然者。若謂政教無越俎。何必英而預埃及之吏治乎。蓋埃及爲土版圖。今不越其國。而俎其地。是形勢以然。牽制宜然。權勢尤不得不然也。若中華者。遠在數萬里之亞

洲。即使中俄有釁。於歐諸國。無所謂痛癢也。獨英則岌岌然。促促然。幾欲爲中籌邊置戍。聯力拒俄。無他爲其商利之大局也。若他國之逸者。不但如秦之視越。甚且耽耽隣隣。伺機幸隙。欲得鸚蚌之相持。而遂漁人之甘心。由斯觀之。可知中華與土耳其。雖同一迴殊。歐西之政教者。惟自形勢論之。其安危勞逸。已判若霄壤之遠矣。時至今日。爲英計而必欲中以拒俄者。非有道。使中力能自強。則無以爲也。欲使中力能自強。非有術。以勉中。兼修其政教。亦無以爲也。蓋政教修。則舉國用命。舉國用命。則野無遺才。野無遺才。則內訌可消。內訌旣消。則外侮不警而惕矣。加之天尙吾正。則厥怒維息。厥灾維斂。人慕吾誠。則有無可通。百廢可舉。誠若此。又

焉患乎。何亂而不弭。何敵而不破。何往而不利哉。說者曰。歐洲諸國。地則犬牙交錯。民則異教同居。未或逸也。普法之役。事隔二十餘載。善後於茲。日不曠備。方且法欲結俄以復普。德在聯絡以戒備。豈非歐之兵釁。正未有艾乎。余則曰。獨不聞乎。人以性鬪。國因地爭。歐之民性。嫉暴而忌大。見分即喜。聞駢卽懼。教有不同。情益見殊。今者法之謀德。猶昔者法之謀普。今者德之備法。猶昔者普之備法。均一謀備也。形勢不必噉也。惟當日法在歐洲稱帝。普在列邦稱王。顧名思義。大小強弱可知也。詎意經斯一戰。君俘地削。納款尤爲亘古僅見之數。自是法改民主。普號德帝。彼爲民主者。又勃勃欲發。若爲德帝者。乃殷殷戒嚴。天道如撻圓。大者一破。則

小者爲大。小者不破。則破者愈破愈小。至於淪滅。此所謂有者復加其有。無者並其所有亦奪之。栽培傾覆。何莫不然。嗚呼。可以人而不知道乎。法之未卽再居禍首。與德兵戎相見。其或未知鹿死誰手者歟。大抵西人俗尙西教。耶穌教人怒不竟日。雖然人情有異。道理無或殊也。法之見挫於歐之弱小。而戕甚於遭普者屢矣。當斯之日。何嘗無矢誓不忘其辱。洎乎時遷勢徙。而更狼狽相依。讐仇駢駕。臘取分肥。頓忘夙恥。方且德之寬宏大度。嘗思歸地修好。又安知法終不以昔之忘英忘俄。轉而忘普。誠有一日如是不好。但爲亞洲計者。將費無限之招架。而爲英謀者。又胡能高枕而臥哉。自來成敗利鈍。驗於理勢者。如響斯應。以政教之得失。決德法

之來局。明眼人早已料定。其勝負之甲乙。雖然。敗者不得不安其所敗。而勝者又孰能免其不一飛而冲天哉。顛顛倒倒。究無補於亞洲之大局也。天道報施。間不容髮。非但廢興存亡。關於政教之得失已也。若夫弱而未底於滅。強而未猝於盛。是其畸純畸疵。而報之者。亦必以偏優偏劣。示人之趨向。所以俄雖強。而有黨人之制。使君不能越雷池一步。日本亦一顧盼自雄者。奈奮發甫始。力不遂心。萬一人事果盡。天機尋轉。或俄得放寬其步履。或日得暢紓其操縱。當斯之日。欲亞洲大局。求其靜樹依然。平流如故。勢不能也。

此權下癸巳十二月見萬國公報
任天下之重者。動云時不可錯。機不可失。然而究其所以然者。又
無非趨富貴如逐鹿。當廉恥如敝屣。軍國大事。漠然無關也。今日
者。俄困於黨人之抑。英軛於商局之累。法在奔命以復普。德在悞
惶於戒備。是天使四大弛張。特為羣弱造福。昇有國者。得間以修
省。乘機而綢繆。未始非與國之大幸也。雖然。福有恒暫。幸無定體。
要在識天心者。能因時緩急。隨機應變。毋或苟且偷安。以待時遷
事過。福去禍來。方歎幸而轉為不幸。不亦左乎。然則奚謂乎修也。
革其逆天之邪者。諸佛之無靈也。鼎其順天之正者。耶穌之天道
也。奚謂乎省也。去其缺宜失當。牽制株連之刑法。尚其至誠盡善。

任天下之重者。動云時不可錯。機不可失。然而究其所以然者。又
無非趨富貴如逐鹿。當廉恥如敝屣。軍國大事。漠然無關也。今日
者。俄困於黨人之抑。英軛於商局之累。法在奔命以復普。德在悞
惶於戒備。是天使四大弛張。特為羣弱造福。昇有國者。得間以修
省。乘機而綢繆。未始非與國之大幸也。雖然。福有恒暫。幸無定體。
要在識天心者。能因時緩急。隨機應變。毋或苟且偷安。以待時遷
事過。福去禍來。方歎幸而轉為不幸。不亦左乎。然則奚謂乎修也。
革其逆天之邪者。諸佛之無靈也。鼎其順天之正者。耶穌之天道
也。奚謂乎省也。去其缺宜失當。牽制株連之刑法。尚其至誠盡善。

仁愛和平之吏治。庶乎天心悔禍。士志成城。是修省也。奚謂乎綢繆也。禁鴉片以甦民困。興西學以拔真才。講栽植以收農利。務開挖以資機政。廣製造以遏漏卮。築鐵路以折跋涉。布電綫以周呼吸。置日報以長耳目。若夫城池臺壘。砲艦軍火。是技之末。藝之終者。要視己之趨縱遠近。定吾之守禦多寡可矣。乃若今世之言富強者。大反斯道。天心不講。民志不修。日以軍藝從事。意者較易與人駢駕齊驅。畢竟又不知駢之謂駢。駕之謂駕。安望其能齊驅乎。夫駢駕者。勢之均也。齊驅者。力之敵也。勢力均敵。然後可以奔馳逐北。西人之於馳騁比賽者。未事而先訓練。駕駛。臨場而必權衡重輕。稍有贏絀。畸零。非平不賽也。不謂近代之競角逐者。此駕騏

驥。彼馭駑駘。人有王良千乘之牡駿。吾無造父十疋之騶驥。又欲與人折衝範圍。曠日持久。而不爲蹄塵掩殘。可云幸矣。况欲期其必爭標奪錦。誌勝叙勳得乎。又有說也。馬雖多而且良。非有善馭者。亦無以爲也。即使罄盡國儲。發盡地藏。購盡天下精駿。使無善馭者。其能有濟於驅馳乎。矧而隱微中。猶有操成敗之天。苟不稍致締結。焉能允如操券乎。大抵說天心者。雖冥冥中。尤明若觀火。恃賢智者。質之掌上。且不以爲然。是亦世界之通病也。所以天道一本。教分數門。天亦不得不以盛衰榮辱。徵教之純疵邪正。有國家者。要當統觀全局。比較興衰。夫然後如孰者。因何而強盛。孰者因何而衰滅。按圖索驥。便瞭然心目。齊東野語尙云。東鄰兒女遭

夏楚。西鄰父母省淘氣。人非木石。豈真欲坐任循環之輪轉。天道之推移。不亦冤哉。或又曰。西俗尚爭。西人好戰。豈耶穌亦教人戰乎。再應之曰。耶穌雖義不教戰。而道亦教戰也。惟戰道不戰兵。所以人雖因教而死。而道益大行。人孰不希生而惡死。無奈其道之足以戰者。在死得其所歸。天下事少所見者。每多所怪。人道尚戰。天道豈能不以戰隨。粵稽維昔。上帝不但教人戰。且導人戰。其戰也。戰道亦戰兵。苟有其道。所向必克。苟無其道。雖堅必破。是故默示錄誌。上帝云。如有勝敵終守我命者。我將畀以權。使制異邦。叩以鉄杖。毀之如陶器。偉哉。西人之出歐海。而馭五洲者。未始不深明此義。所以通商不問傳教。兼如世之曠曠者。滔滔皆是。幾乎不

謀而合。凡教之所到。輒異其人。而嫉其道。不問是非。不察邪正。一味奮臂迎車。其能不爲摧殘。而糜爛者得乎。間或有一二痛定思痛者。但知事因教起。乃多方辯論。百計營謀。雖任增開商埠。或倍蓰賠款。總期其必收回傳教成約。而獨不知。君子務本。西人得縱橫寰宇者。無非憑藉斯教。茲欲求其斷根毀本。不但西人不敢冒昧以行。而天亦不容其有是行也。嘗聞天竺有好事者。問於西人曰。爾人傳教勸善於吾國。何爾國又奪吾人之邦國。彼西人應之曰。吾人受天以必傳之道。隨在必行其教。情迫於天。善欲人同。非欲以勢相勉。無奈爾人忍心害理。不但不問教之所教。道之所道。更肆意焚殺。盡情窘逐。務欲剪滅其道。吾人既受其教。不得不以

其道與爾人爭。其如爾人無道以勝其道。是故滅爾國。君爾民。以驗其經曰。耶西之根株將萌。君異邦者將興。異邦人賴之。噫嘻。則此一問也。而後知耶穌之教。非止爲勸善來也。更有權。以懲剛愎之不善者。而甚於起滅人之家國耶。謂廢興存亡。無關於政教。言在五十年前。余或信之。若說在今日。則我豈敢。守經子曰。子是誠狡兔之有三者。所以當窟而不屈。世之通變者。自古有之。無奈聖人教人。亦止於貨悖而入。亦悖而出。所以方孝孺先生曰。漢懲秦。魏懲漢。歷朝互懲。無代不滅。上下相承。數千餘載。雖聖智賢豪。莫不引爲典故。獨子欲役一己私見。教人鼎革政教。以爲長國家者。創永言配命基業。計卽善。而情亦殊苦矣。其若人將不爾聽也何。

居士曰。余固知人之不吾聽者。其在病吾言耶穌。要非吾言非理也。而獨不知吾之長於言理者。無他憑藉其所教耳。方今天下之言耶穌者。無一不爲富強鼎盛之雄國。恥言耶穌者。亦無一不爲阨窮削辱之小邦。豈非冥冥中。固有主宰存焉。討武檄曰。請看今日之域中。竟爲誰家之天下。余竊改之曰。試觀今日之天下。將服誰氏之教化。先生姑誌斯言。以驗後吾文之言耶穌者。幾皆當權有位。博學而善德之者。

...

躬自厚篇

中日構釁以來。荏苒半載。風聲鶴唳。各處生理冷淡異常。貿易中
人。大都改粟布之煩惱。借登臨以遣興。有某海客者。一日落窠無
聊。突友人趨謁。談次縱論時事。沿及西學原流。友人雄談碩辯。須
臾別去。客竊憾之。既而諸同行遊歸。客復述前說。咸捧腹大笑。先
是友人爰某君。引子書徵序西學大成一則。其文曰。今世競尙西
學。而不知西學之原。皆自中國始也。上古結繩而治。洵洵穆穆。安
於簡樸。有聖人作。始制文字。以啓天地之籥。於是書籍代興。能者
輩出。有圖譜以繪其形。有記載以闡其理。前民利用。日出不窮。而
殊荒異域之間。遂亦有才俊之士。竊取成法。而變化之。密益加密。

新益求新。幾若中國古人之書。尙有不及知者。此可以駭淺夫。而不足以欺識者也。蓋天之術。本於周髀。西人之言算學天學者。不外是也。地圖之說。本於大戴禮。西人之言地學者。不外是也。伯益山海之經。疑若荒遠。然如班固。范蔚宗釋。法顯之傳記。言外域者。詳矣。皆史學所自出也。孫吳火攻水戰之論。疑若疏濶。然如墨翟武侯。張綱羊侃之製造。言機巧者衆矣。皆兵學所自出也。惟金三品。肇於禹貢。周禮且有專官。中國所以言礦學也。而西人仿之。黃鐘爲本。律呂相生。樂經且有專書。中國所以言聲學也。而西人效之。淮南齊俗訓云。蝦蟇爲鶉。生非其類。惟聖人知其化。此中國言化學之始。列子湯問篇云。均髮均縣。輕重而髮絕。髮不均也。均也。

其絕也。莫絕。此中國言重學之始。亢倉子曰。蛻地之謂水。蛻水之謂氣。此中國言汽學之始。關尹子曰。石擊石生光。雷電緣氣以生。可以爲之。此中國言電學之始。若夫光學之說。見於墨子經說篇。有以表言者。有以鏡言者。其文間亦譌奪。而其義則綦詳矣。然則西人所稱爲絕學者。皆出於中國圖籍之中。非獨借根一術。彼士天文家。亦明稱爲東來法也。世之談時務者。自命爲通曉西學。侈言不慚。而橫經守道之儒。乃非之誚之。至以用夷變夏相譏刺。予以爲皆非也。誠知夫西學之原。一一皆始於中國。則習之者不足多。而鄙之者。亦良可已也。同里盧君梯青。王君西清。同輯西學大成一書。採取中外人之作。以類相從。爲門十有二。今年夏刊之。問

世而乞序於余。余未嘗習西學也。然於百家之書。則固瀏覽及之。爰備述所自始。爲世之學西學者告焉。述竟。坐間某甲笑曰。所序備極周匝。更復有光吾輩。惜乎不但忝於自厚。亦未始非所以招尤也。不然吾儕今日遊幸之緣。詎非彼眼如豆者。平時筆鋒口過之由結乎。誠依是說爲序。較不若以大學全章填寫。尤爲妥洽。何則。大學自蓋人心之靈起。至以求至乎其極止。其間六十餘字。無論既往未來之學。靡不包括在內。亦皆爲吾華素如固有者。若欲畧加粉飾藏拙。何妨多書兩筆。謂索隱行怪。後世有述。吾儒弗爲。誠欲必爲。亦猶爲長折枝。非艱於挾山超海也。以此爲序。不且較爲自然慷慨。不出乎此。而必旁搜曲引。反爲智者視等無謂。大抵

人生斯世。總求利身。利家。利國。利天下。雖粉身爲之。亦不謂過。若必捕風捉影。專事筆鋒口過。徒以恣情縱慾。幸而人以大度放過。不幸而狹路相逢。將是吃虧懊悔。試問苟使西人不以所學爲大公。秘而不傳。請某君以百子書躬爲西學。吾知其一無所能也。而曰竊取吾之成法。是真彼所謂足以駭淺夫。不足以欺識者。客曰。子旣知有光吾輩。便是某君好意。裝璜華人體面。夫豈無益於子乎。甲曰。此輩安有好意。彼一向如穴中螻蟻。外間生死關頭。毫未聆過。凡有作爲。總是賭誓叫人耽罪。况此等體面。亦惟從百子書論西學者領之。如不由此道以學西學者。再也不敢蒙其體面。若吾輩牽車服賈。謀生異域者。尤期其從此不再以筆墨種孽。累吾

儕陰受其禍。則可云幸矣。若曰依某君序法。謂體面。何異人以高閣大園。擢置奇禽異獸。號之謂博物院。吾亦可以五畝家八口宅。藏山海經。百子書。而曰。是亦吾博物院也可乎。天下之能言者。亦復多矣。何取而必效彼操強詞。奪正理者之所爲。回憶昔一孟買人故事。先是孟買爲印度別部。附列天竺西鄙。其民素喜袴長戴白。俗呼之謂白頭國。當時英人航海東來。跨有其地。遂隸爲版圖。該處沿山麓。傍海濱。地沃民富。土產棉花爲最。通商以來。凡隸英籍。有志涉遠。懋遷者。均可一例挾資來華。租行設棧。標謂英商。有一白頭人。前此來稻貿易。好事者。因其服非英制。一日坐間與語。詰其邦族。彼答曰。敝國俗稱孟買。遠在天竺之西。好事者復詢其

胡爲標帖英商牌號。彼復答曰。吾國本爲文物之邦。君行仁政。民尙禮義。雖日用所供。無事不敢妄開殺戒。當此天下多事。英雄並起。盜賊充熾。吞併是務。劫掠是圖。寡君不得已。操經就權。不惜重資。遼涉萬里。聘請英國兵艦前來。藉資鎮壓緝捕。特患民間猜疑。故並權政委授。俾專所責。自是凡敢妄生窺伺。以圖櫻噬者。英當竭忠堵禦。以期不負寡君委命。今者吾人東來經商。難保不無錢債交涉之件。其所以標其名號者。萬一被欠應追。當惟該領事是問。則此可知世之能言者。豈但某君已也。若孟買人之談吐者。可謂不辱其類矣。子胡不書之。以質世之強項硬口。夜郎固執。與夫逆道背理。苟安失機。至於乘輿蒙塵。亡家破國。卒而俯首帖耳。甘

認他族爲君父者。問其曾一學到孟買人之利舌。能作大言以欺人否耶。

解悞上

先哲倉頡。以象形制字代繩。初何嘗不欲求其澈眞畢肖。使人觸目便知。所居何意。如一。二。三者。雖目不識丁之輩。亦知辨爲某數。無奈物多事繁。時遷地異。或隱衷竅竅。摸索莫從。或意會衾懷。形容不出。不免嘆多魚之遺漏。慨契舟之難求。是故字之由來。雖有象形可憑。要非口傳指授。難期瞭然一目。茲按悞之一字而論。書法始從左邊偏。心豎起。繼而張大其口於右上。以蔽口底。下一大之天。意者以其居心偏易。口出大言。所以悞也。何則。心偏易。則念慮不清。念慮不清。則乖張任性。其次口大言。則意不誠。不誠則謊誕。謊誕則矯誣誇張。一經任姓。又復誇張。加又天爲之一蔽。則暗

無日頭。無日頭。雖有目看不明。雖有耳聽不清。不明不清。則高深不知察。安危不能辨。造作經營。總是孟浪行去。得失死生。聽諸天命。此是悞字本文底意。雖然。悞之爲害。亦未始非無因而然也。若者爲貪而悞。如人爲財死。鳥爲食亡。若者因殘而悞。如暴虎馮河。死而無悔。此是畧言貪殘之悞。其實世道綦險。一不經心。亦無所不悞。所以人人皆有悞。雖聖亦不免。惟悞有大小。有公私。有人我。有是非。果耳悞於公是。雖大亦非分事。不幸悞於私非。雖小亦難辭咎。大抵公是之悞。多由天。私非之悞。多由己。且悞之由來。未有不由漸而起。終至積重難反。至於放辟邪侈。或身罹大辟。或家破國亡。推原其故。或幼失怙恃。長無教育。或暱自父兄。或縱由師傅。

或驕生梁肉。或傲起權貴。卒至矯矜暴戾。習與性成。以至於悞。總之悞之爲言。罄竹難紀。或悞人。或悞於人。各有所因。各有所悞。或曰。依子言。是偏心大言者。故蹈於悞。若正心慎言者。可慶無悞乎。何又曰。無人不悞。甚至聖人亦悞。其亦有說乎。應之曰。武侯爲天下第一軍師。且能運籌操券。鞠躬盡瘁。尙云謀事在人。成事在天。此是莫之爲而爲之天。莫之致而致之命。非悞之罪也。僕所論者。是錄其大。而遺其細。取其常。而舍其變。人非造物。孔子雖聖。亦何嘗無悞。無徵弗信。不然何云在陳絕糧。是亦悞也。又曰。假我數年。五十以學易。可以無大過矣。夫過亦悞之謂也。况易作於周公。而周公亦不免管叔監殷之悞。推而至於堯舜禹湯。亦未有一能免

於悞者。堯舜禹湯。率性行道。世無敢顯指其悞者。詎知後世之秉國是者。未有不欲竊其名曰。吾亦行堯舜之道也。更至遭災被阨。不肯稍一通變。謂非堯舜所傳者。吾不與聞也。此是堯舜雖未自悞。何嘗不因其名高。卒至貽悞後世。與其名高悞人。孰若當時無此堯舜。以爲今日藉口之悞。不更愈哉。此不過反側借喻。要皆人之自悞。否豈真有賢聖。而能悞人哉。或曰。果如是。不但古人有悞。而今人之悞。更有甚矣。但時已過矣。前事不忘。爲後事之師。何妨言之。俾當局者。知悞之所在。未始無裨執事警省一助。應之曰。以時事論悞。所悞亦復多矣。約畧言之。如挾政教。持吏治。藐神道。縱禿俗。凡此四者。爲陰悞最烈者。有一於斯。則無所不悞。况四者兼

有。其悞豈堪勝言哉。其次悞於國古。而疆大。民多。而蓄富。以上係悞之緣起。茲以時事所悞而言。始則悞於西人之厚道者。謂彼既專務通商。吾亦無患於家國。次悞於髮逆易平。謂殲之如摧枯。滅之如拉朽。再次悞於西征迅捷。謂擣之如驅羊。撻之如逐豕。又次悞於法難遂和。謂曾捍過洋仗。已摧過大敵。終悞於善後。創設兩座廠。建置幾所塢。添購數條艦。增買幾萬槍。謂經費貴重。必其具有神通以護國者。自是凡先後與有其事者。或書勳。或薦爵。軍國大事。漠然置之。似謂今而後。毋復敢撻吾鋒者。從此可以高枕安臥矣。獨不知西人之厚道者。不過十中一二。碍爲通商利權。默牽。故遇事不得不委曲弭和。藉免兵戎相見。以罹廢時失業之禍。而

主津新集卷參
次之八九者。則眈眈隣隣。樂災幸禍。其未卽發。要皆限乎時。而制於勢。乃中國悞謂能歷過風波者。便是躬能折衝於無形。戰勝於不兵。此是自來因教釁事。周旋過了之悞。至若髮逆易平者。內有僞類作難。交相殘賊。互爭雄長。外無可通口岸。以資接濟利器軍火。加又西人從旁掣肘。垂敗潰散之機。不待戰已自形矣。一旦全力搏之。自然滅此而朝食。他如西征之役。藉吾精銳靈巧快槍。殲彼烏合腐壞廢器。但使率殘跛與鬪。尤不患其不如狼逐豕。何況臨之以恒征慣戰舊部。撻之以新式快捷軍火。又安患乎。所到而不披糜哉。至若法難條止者。適彼內有必復之仇待報。外無同盟之師可持。孤掌難鳴。胡能懸軍萬里。侵人重地。斯時雖有北圻基

隆之戰。不過嘯聚安南等處亡命。虛張聲勢。借爲恫喝。一見勢餒情促。自然轉圜弭和。擺尾而退。尙得謂捍雄師。禦強敵之可比哉。若夫善後經營。制造局廠。礮艦械器。雖經訓練有年。勤習成軍。奈平時不肯用誠懇孚信政教。以培育精靈果敢之士。及至臨事。自然莫從羅致。此是中國種種嫉新欺異。藐冥忽幼。泰然自滿之悞。以致目前中日之悞。卒至一悞幾不可收拾。嚮使平日不有許多積悞。則茲時決無中日再悞。而將來或可藉免他年續悞。余於是執吾之筆。以解天下之悞。嗚呼悞爲天下所共鑿者。夫人而知之。欲其不悞。誠易易也。奈何人偏欲蹈自己之悞。以討天下之鑿。况孰必強吾之悞。畀彼修己待悞者。得間以乘吾之固悞。噫吁嘻。不

西人之居是邦。以擅中國利者。莫英人若。其最悞中國。而將反自悞者。亦莫英人爲甚。何則。英國與中國交涉。不外通商傳教二事。通商者。所以謀利。而傳教者。所以賠錢。利令智昏。自然視通商爲重。視傳教爲輕。但使其能撤去賠錢傳教。專事謀利通商。詎不更裨於英人。而無擾於中國哉。何英不決然以行。此其故。皆因同一樣英國。而爲通商傳教者。亦同一樣英人。旣不能二致。亦自不能揮之使去。中國曠曠。猶知藉口以神道設教。英人精靈絕巧。安能不賴神道爲維繫。况教爲天道神理。舉國咸宗。彼爲商人者。何嘗不遵奉是教。且經書明載。天必以是道傳。此所以因教釀事。雖累至通商全局俱廢。亦無能以教爲咎者。是懼冥冥中。確有頻試輒

驗。之赫赫巍巍者。宰乎其間。此所以公法同戴。有教必傳。毋容或擯。由是觀之。英人雖能委曲抑教循人。然將不能以傳教二字抹去。旣不能抹去。而又守口如瓶。曾不肯以教關廢興存亡。明示中國政府。使之澈知畢解。乃一任浮沉阻滯。行見一日釀出不可設想鉅禍。擢及英國商務利權。悔亦晚矣。他如眼前東亞諸國。一味困弱垂危。局外者眈眈隣隣。伺機幸隙。圖欲一鼓作氣。謀奪瓜分。英雖居間周旋。以顧自己商局。無奈不以直道正行。徒以偏法私誘。雖欲保之不尤害之。此是英國悞人之最烈者。畢竟將歸於自悞。卽如眼前中國困弱。如人得閉結不通之症。所病不過吏治政教不修已焉。英若有意爲解此无妄之疾。使能固本復元。尤當勸

令飲和食德。以修政教吏治。爲創始奠安根本。不事於此。而乃所派方藥。不是附子干薑。便是朴硝大黃。慫使末逐軍火藝術。謂苟有此。必能自強。意者彼國所強不外乎是。此何異爲牙儉者。但求主人翁買業。以厚其產。不問其子孫能否掌管嗣繼。猶之爲媒妁者。只論人之門戶匹敵。聘奩豐厚。不管新郎新婦或有痼疾殘跛。斯不但無裨主人翁之有產。亦何益新郎婦之得配耶。試以一事質諸世之處強盛若英美德者。假令以中國吏治政教行於彼邦。問其能否仍然一樣強盛。我知其必曰。勢不能也。嘻。己且自知非有仁愛和平吏治政教爲根。雖任有許多軍火藝術。終不能使國底於富強。今欲致人於富強者。又不以其所以富強之道傳授。而

徒誘人從事利權猛力。獨不知端不舉而末亂矣。使無善政善教爲維繫。雖衣食家常之事。且不能從容自若。况欲求其與知民生利權。軍國大事得乎。此不但無異於爲牙儉媒妁者之操技。而甚於教傀儡以換頭。不尤悞而又悞乎。斯乃英人悞人之大畧者。友人曰。英人悞人止此乎。先生可謂慎言矣。更有甚焉者。試以日報一項論之。在外國行者。每視等金石箴言。奉爲晨鐘暮鼓。因其能直言侃侃。專事譏諷鼓厲。一經東來開設。雖用西文作報。亦不免追隨華報。仿效粉飾諂諛。種種妄謬沿悞伎倆。幾忘日報本來宗旨。豈西人一至中土。亦變換眼界。喜閱讒諂面諛之論。若曰。斯乃業此者。專爲備售華人之諳西字者。特爲生理招徠。以示居是不

非之義。難怪其棄道從俗。見利遺義。若夫倡之於教士。設之於端人。所謂月報者。何以其間亦有等如賣雜貨者。揣其意似爲益世利民而設。然求其必嚴厲脫俗。無復夾雜鋪陳。亦幾稀矣。此其間雖未可責爲筆墨悞人。而稽遲無謂之悞。亦自不淺。再應之曰。毋厚非也。野諺云。入風隨俗。入港隨灣。相沿傳染。比比皆是。何但西人寓中國者有之。若吾人出洋謀生者。亦何莫不然。四海兄弟。天下一家。要染得其所染。若由余亡如犬戎。何嘗有害於義哉。若染不得所染。如仲子欲效夷齊之操。以居於陵。夫豈有補於世哉。所以西人東來者。不區傳教經商。奉使供職。無論所至何國。所居何地。例必三五年回國一度。雖曰省視親舊。其實爲重習故鄉風氣。

俾免久居他邦。變爲異域族類。因是西人雖有悞。不難藉悟以自新。將不至若吾人。一悞再悞。甚至旣知其悞。必底於悞。幾幾乎許願回頭再來。誓甘重悞。所以不悞則已。有悞必獲大咎。友人曰。誠如先生所言。是悟可謂悞之對乎。終應之曰。非也。夫悟者左是偏心。右是自己。已知偏心。便易生悔悟。若不反悔。又何補於悟。是以不能與悞對。其實悞之所對者慧也。何則。慧之爲義。上有兩個主。是不恥下問。可經可權。三思而行。不敢孟浪釁事。中有一個開半邊之口。是隱惡揚善。不敢譏謗妄言。內有一個藏不了之舌。是知必告。不識便問。非敢使由。必可與知。下有一個底於正之心。是遇誘不惑。見善勇爲。人苟能從慧字上去做工夫。又安患其能底

天行道。發政施仁。所以定禮制樂。不能擯去兵刑。亦莫非本於仁義。非教人捨仁義。從事虛設之禮樂。此所以孟子云屋漏。耶穌言隱微。益信仁義特超乎詩書禮樂遠矣。野諺且有兔死狐悲之喻。豈人能捨仁義。而徒託王道教化。則云駕乎萬物。誠若此。是所謂萬物之靈者。反不若彼無王道教化之禽獸。而能守不相殘類之天良。偉哉因教而云屋漏。可知仁之爲義。其大無垠矣。蓋屋漏者。非但指暗室而言也。舉凡處於可惑可欺。曖昧不清之境。亦無一不謂屋漏也。噫嘻。人於屋漏尙須圖爲善德君子。况夫處光天化日之中。行有目共賞之地。稱富道強。爭盟主。競牛耳。自許宇宙內之純被教化。如歐美二州諸雄國者。竟任夫販鴉片爲貿易。以荼

毒鄰國。又飾詞利權各擅。政無代庖。詎非明認天以下。同一不仁之世界。自應各私所短。無得越俎干預。此尙得謂禮義王化者乎。大抵斯害雖係吾人自取。然使非坐視不救者。縱成其惡。當不至若是其慘烈矣。東經曰。天討有罪。西經曰。不與我偕者。則爲我敵。何怪天災之來。無國靡有。是皆因販此以禍人者。情同謀財害命。不之勸勉阻遏者。罪等坐視不救。孟子云。惻隱之心。人皆有之。未若耶穌所謂恩必及敵也。由是觀之。則凡同此覆載。莫論服孔孟從耶穌。稍知大義。自當痛心疾首。立會設救。藉挽狂瀾。旣倒。斯爲中者不失聲名文物。爲外者無忝禮義王化。不出乎此。以至災害頻仍。而乃興言天道如可憑。災祲不適善。嗚呼。故爲戕生與坐視

不救。亦可謂善乎。不知耶穌謂不與我偕者。是明言不同其爲救世者。若謂政無越俎。何陳成弑齊。必孔子請討。詎非因懲惡以儆不善者乎。矧夫鴉片之害。起自印度。繼入南洋。遞遍中國。今即由中國折而之新舊金山。當此邳治盛世。尤任鴉毒廣植普運。安知將來天良日泯。世道日衰。滋蔓之禍。不流入歐美二州。有心人所宜同深感慨者。在禍將迨及子孫也。眼前鴉片之害。其酷且烈。盡人而知。殺人者。謂吾貿易也。殉欲者。謂吾市貨也。使其蔓沿推廣者。謂順輿情也。若夫詞有可藉。義能阻遏者。尤謂事非干己。無他。窺伺此間之當局者。兩敗俱傷。而後起收漁翁之利。不然。孟子且云。赤子匍匐將入井。非赤子之罪。耶穌亦云。陷赤子於罪。其人勿

生爲幸。夫赤子匍匐無罪。是觀其入井者之罪也。今者鴉片爲害之毒。坐視不救。均一陷赤子於罪也。雖曰茲日以此爲貿易者。皆堂堂上國。然觀其當局之迷。甚於赤子之匍匐。明眼人雖力有未迨。若英教士者。尤知倡會勸禁。獨夫勇如孟賁。奮若專朱者。不但了無悚惕之心。起而勸勉阻遏。甚無一言以譏諷提醒。此其可謂人世之天下乎。若必諉諸事非干己。未便過預。何當日美國因黑奴之役。必英之日報羣起交謫。激美大申撻伐。幾成裂疆分土之禍。何若而人之善忘者。而不體天行道。借矛刺盾。再以仁義利害說中國。吾知英雖色勵內荏。未必忤衆。而縱爲不仁之貿易。中卽欲罷不能。未必違議繼爲不義之栽植。果如是。卽鴉片之禁。拭目

可俟矣。或曰英亦知鴉片當禁。所以遲遲者。慮印之將亂。余曰天下事莫外道理二字。印俗回佛並尙。彼爲教中人者。孰能不以仁愛慈悲爲歸依。况英得擅印者政也。無關於鴉片。印旣泛難自統。捨英又從而奚適哉。

答客問難

有顧余問難者。謂先哲有言。愛之欲其生。惡之欲其死。旣欲其生。又欲其死是惑也。謂爲此言者。是詆夫世之譎者。居心處事。不外於斯。故諺有之曰。過橋抽板。得命思財。大抵此等魔病。皆由情迫於勢。不得已而卒行。斷無雉兔盈塲。竟有毀弓烹犬之者。孰意言雖寓物。竟有情見實事。如海上日報。有正月初十之作。題爲歐洲

近日情形。文則長篇大論。句則風雲變色。始讀之肅然有感。再讀之勃然而駭。三復而詳察之。則廢然若有失焉。因其立論堂皇。指徵明澈。獨於命意立義。不免涉於慢舊誨迷。殊背興利除弊引入入勝之一著。令讀者如在山陰道上。仰觀旭日當空。一塵不掛。倏然而冰雪飄忽俱下。於是乎歎文人言論冰炭。文章水火。有如是焉。依其演說。施於有政。亦惟坐待循環輪轉。守候天道徙移。毋須費心經營之過慮也。以若所爲。誠不知其何所感而云然。子能毋說乎。則應之曰。斯文余曾見之。毋厚非也。夫日報者。名爲西人創設。實則主其席者。無一不爲吾國之學博古今。智貫中外者。爲之秉筆。故凡抒論著說。皆明存治體。默授機宜。因是溥海臣民之閱

是而奉爲金聲玉振者。近悅遠來。戶以萬計。所以然者。以其立論井條。冠於他報。命意沉着。切中時事。誠不減屈大夫之離騷。賈長沙之過秦。讀其文者。莫不歎服其無官守。無言職。卒能暢所欲言。言皆有中。固能獨當一面。不容末議附參。今此一失。不過急於揚己抑人。自然忽於檢點瞻顧。俗諺曰。古人尙缺。今時憾。今人安知昔日情。若孔子者。世稱至人。然尙嘆顏回之歿。即其缺於天道明矣。可見後世之申言循環天道者。不過飾詞護短。其實心思耳目。皆有所蔽。胡知天道之所以謂天道。循環之所以謂循環哉。此所謂有所長者。必有所短。不然。中國人尙有識不了之中國事。西國人又安能窮極西國理哉。况欲役一識不了之偏智。斷盡兩難窮

之奧理。談何易易也。試以一言徵之。西人之出歐海而馭五洲者。除教士之外。則但知其所挾恃者藝術也。而不自知其所憑藉者。乃政教也。所以或問其耶穌爲何如人。教士爲何等職。彼將曰。吾國之有耶穌。猶貴國之有菩薩。吾國之有教士。猶貴國之有和尚。噫。名雖近似。實則相去了無道里可計。蓋耶穌神然。其靈非言可喻。菩薩彊然。其倥不言亦喻。教士者。所到則化行俗美。民富國強。和尚者。入疆則土地荒蕪。民無寧歲。此是西人不知西事之大畧。若中國人之不知中國事者。問其中華何以若是之削弱。彼則但知軍藝不如人。不知不如人者。乃輸人之政教吏治。此是華人不

如華事之大畧也。雖然。西人處於強盛。華人處於削弱。一明一昧。

三海新集卷之三
遙遙相對。又未嘗無一不自詡體天行道。而亦未嘗無一不彼天災之相繼。禍害之頻仍。豈天不以其災禍於他人。而獨禍於體行其道之者。雖然。被災卽同。而其輕重大小。得失榮辱。則又判若霄壤。此其間固有造化存焉。能明乎此者。庶乎可以談循環說天道。按圖索劍。西人且有不知西事者。况中國人焉能窮明西國理。未明未知。而肆口卒言。是真所謂能欺愚者之一世。不能誦智者之終朝。難者曰。子旣劈人之所不知。是自炫知人之較詳者。敢請爲斯論寫一反照可乎。再應之曰。屋漏尙怕天知道。道破不值毫釐。所以孔子曰。夫人不言。言必有中。余雖不能窮人之所不知。如欲借矛刺盾。作斯論之翻辯。誠易易也。無奈世之爲談士者。無人不學。

蘇張利口。備取悅者。皆如孟嘗之司聽。我又何苦必效孔穿。固與公孫龍爭白馬爲哉。惟人生斯世。上旣無福以致君。下更無德以澤民。所冀者在作一後生之孔子。重復刪詩。定禮。修春秋。闡天道。作中流砥柱。挽旣倒狂瀾。誠若此者。是在能虛心遍覽天下所有之經書。鑑觀萬國廢興之軼事。夫然後知所立言着筆。若必執我之所是者。拚命是之。我之所非者。抵死非之。雖任著作如山。能無爲天下後世羞者得乎。今日者。世運畧轉。視聽寄於海外。言路開於租界。未始非耶穌之福庇。否則不能也。夫耶穌者天也。彼云苟能側身修行。戒謹恐懼。未嘗不可默挽乎天心。斯真萬世不易之至論。無奈人不識天。又焉知天亦有心可挽。姑有告之曰。吾識天

吾知天。吾欲以其道薦使共結而默挽之。而人更不問道之所道。挽之所挽。一聞言天者。必欲羣起而攻之。驅逐而盡之。是平日不以天爲天。又何必多此側修戒懼爲哉。又曰。一治一亂。雖人爲之。而亦天有以使之。時運之所至。卽賢人君子亦且退聽於無權。噫。自來數千餘載。無人無日不言天。畢竟不知天之所以爲天。能毋愧乎。所以同一執筆者。時欲有天。則大書告戒。時或疑天。則隨意譏詆。時或怨天。則肆言詆毀。然則天亦何辜。而必受此炎涼輕薄之醜態。今以雄才大畧之作。又必引徵言天。此余所以不解者。豈捨天不能爲文耶。抑亦知捨天則無以爲也。若然。猶當執筆勉人與天周旋。方不失聖人以神道設教之用意也。

擬上萬國籌安策上

孔子曰。人皆曰予智。驅而納諸罟獲。陷阱之中。而莫知之避也。斯言適爲當世賢智。作當頭棒喝。蓋世界上無人不曰智。然而究其所謂智者。無論居何等位。執何事業。總思出人頭地。高人一等。雖竭盡謀慮。用透靈機。所爭無非勢利兩字。無奈利令智昏。遂以賦畀仁愛心身。作邪憑奸惡器。小而殺身殉利。大而滅國殉勢。所以孟子曰。爭地以戰。殺人盈野。爭城以戰。殺人盈城。中國如此。外國亦然。推而至於普天下。之徘徊顧盼。競馳爭逐者。幾無一不以勢利爲然。雖然亦有許多司鐸設教。講道德宣仁義者。卽欲鈞人之勢。平人之利。奈教者諄諄。其若聽者藐藐。無他良心晦。而利心

明。天理輕。而私欲重。以故患利不盈。慮勢不泰。既盈且泰。又慮人將之奪。所以雖有富强蓋世。鼎盛一時。方且亟籌持盈保泰之良策。而終不免天道循環。賢智退聽。詎非勢之必動。權之將徙。無能或奪之者天也。此以故西經云。利盡天下。而喪生命者。何益之有。又云在地擒之。在天亦然。在地釋之。在天亦如是。夫生命者。天國也。今言在地如是。在天亦然。顯有順天存。逆天亡之明證也。誠若此。是世國既沒。天國亦無與焉。故欲期其與有天國者。必先保其世國。欲保其世國者。必先循行天道。試問今世之欲保其世國。以期與有天國者。屈指萬邦。曾有幾何國都。能棄其奸惡之風尚。純行和平之政教。若曰英。吾則謂其瞻顧殊費。若曰俄。吾則謂其耽

隣太奢。若曰美。吾則謂其儲蓄獨厚。若曰德法者。吾則謂其妬忌交深。次焉者。不相制亦相牽。或地之相去。而教且不同。或人之相異。而道並相背。以不相異之人。生聚於必同教之國中。然嘗不免爭奪篡弑之禍患。况欲以必相異之人。馳騁於不同道之域外。安望其能無詐無虞。輯睦相安。方今世衰道微。人尙侵奪。國尙戰爭。駕通商爲虛名。奪利權爲實事。及至見危思退。臨崖勒馬。而又不圖療病治源。回首道岸。乃徒恃人智。亟籌修約增院。以爲調劑齟齬。弭縫嫌隙。將恐人事易集。天缺難補。雖然天道難謀。幸而天心可挽。欲求其保世國。以與有於天國者。要當先行仁愛和平之大道。所謂仁愛和平者。有無相通。智愚不二。蓋有無通。則利益鈞。智

愚等。則權勢平。先其所急。繼其所緩。急其所重。緩其所輕。務其所當勞。寬其所可逸。是則人爵事小。天爵事大。爭利事淡。戰教事危。機雖遠。而防不可不漸也。眼前苟不能行仁愛和平之天道。以復太和之元氣。徒事會盟插血。計謀合從。美則美矣。迨乎時遷勢徙。試問天下曾有幾國。願肯俯首貼耳。委靡雌伏。不圖起而爭一出人頭地。或曰子休矣。欲鈞一人之勢。平一人之利。尙難矣。况欲舉天下皆鈞平。不尤難乎。應之曰。否不然。利雖不能鈞。勢雖不能平。惟苟有道。以潛移默濟。不鈞猶鈞矣。苟有術。以挈長補短。不平猶平矣。所病在人之善忘。前日者。因天道而強盛。今日者。因強盛而忘天道。是此世國先示與天國不鈞不平。畸虧之割絕。又安望其

能計謀以自平乎。孟子曰。古之人修其天爵。而人爵從之。今之人修其天爵。以要人爵。既得人爵。而棄其天爵。庸非爲斯人而謂乎。今欲期其必持盈保泰。非反其所忘。復以世國與天國爲周旋勢不能也。斯言雖迂。要不離道。亦所以爲知者說。非與俗人言。今日者。天道滯行於亞洲。在教士既不能罄國來傳。又不能使人驟信。亦惟鞠躬盡瘁。無所事策。在商人又謂苟能拔此眼釘。舍而棄之。省如許齟齬之禍端。未始無裨太平之大局。此所謂過橋抽板之一流者。不但寓中國之西人如此。遍天下幾乎無一不然。以故通商之案。推之當前。傳教之牘。置諸腦後。執政如斯。尙期與天周旋得乎。夫西人之得拔古起今。或勢盛於當時。或利盡半天下。莫非

憑藉斯道而來。今若此。是忘其來之所由。去之所之。以故但求其世國。務底相安。一任斯道。自爲浮沉。撫心自問。能無上愧於天。下羞於人。辨者曰。子何據。而知吾西人能跋古超今。皆由斯道。應之曰。利令智昏。自昔皆然。史所載。嘗有忘妻忘身。忘家忘國者。莫非先忘其道。何怪爾西人之善忘者。不猶然乎。茲以爾國携來之經。舉一二彰明顯效者證之。如舊約載。耶西之根株將萌。君異邦者將興。異邦人賴之。斯言雖讖。基督將丕降。亦未始不明言。將來凡崇斯道者。必駕馭夫拒而不納者。然旣得駕馭之。益當憐惜而撫綏之。試問今之君異邦者。果皆有善政善法。使被其君者。死生成賴之乎。若曰所論未免失之過當。謂西人治屬。未必盡行鞭笞苛

刻之政治。豈可一律概之。則應之曰。人無求全之幸。孔子爲古今天下至人。因陽貨而遭厄者。貌相似也。余特舉天下全局而論。焉能偏護一人之是非。要惟撫心自問。有則改之。無則加勉。庶乎言者無罪。聽者有益。若以一字之差。或一韻之失。而必剖白譴責。是斯文之作。豈非開罪普天率土之蒼生哉。

擬上萬國籌安策中

粵稽太古文教起自東半球。賢智萃於亞西亞。而天道之學。則獨鍾於猶太。外此如歐美非澳等洲。多爲狃榛蠻野。自漁獵而遊牧。洎乎建都立國。要無一不忝爲異邦族類。何以今能跋扈若是之顛倒。能無復有徵乎。新約云。我將敗智者之智。廢賢者之賢。智者

安在。又云。上帝以若愚之道。拯諸信者。斯上帝之智也。又云。兄弟乎。爾之奉召可見矣。貌爲智爲能爲貴。不多蒙召。上帝選世之。不智者。以愧智者。選世之不能者。以愧能者。選世之不貴者。見棄者。人視爲無有者。以廢世之有者。故曰上帝前。無人得自誇。又曰。如有勝敵。終守我命者。我將畀以權。使之制異邦。叩以鉄杖。毀之如陶器。云云。此不過畧舉其概。以質爾當世之稱尊貴。而誇賢智者。謂此爲不知。是上帝潛移默運。以顯厥能以驗厥經。不圖求知於世。爾人如附舡者。覺其至。而不知其所以然。謂此爲早知。則當友愛相親。戮力天道。凡隸爾屬者。益宜善體天心。遵循經義。保護而善待之。方不失其所謂異邦人賴之。今不法乎此。而乃藐天之荒

遠。忘經之奧義。挾賢持智。誇藝術能。一味鞭笞驅策。苛刻憑陵。視人之家國。當己之魚肉。遇有勢之稍煞者。必爭起而傾覆之。如虎之搏羊。意謂。天生此類。以養吾輩。此是因利之剽奪者。若夫因勢而競鬪者。特駕一言爲釁由。砲林彈雨。傷亡者一仗數千。再仗數萬。相持肉搏。曠日懸久。及至城下盟成。彼此俘獲損傷。殉難陣亡。先後以百數十萬計。其間鰥寡孤獨。向使有案可稽。又奚止倍蓰其數。謂非因勢利相殘。卒至死亡。若是之殊甚乎。今日者。人尙戰爭。邪智日巧。軍火日利。後此之戰。死亡之多。詎能逆料而設想哉。經云。尸所在。鷲鳥聚焉。舉一以例。則羊所在。羣虎集焉。欲使夫希太平。望相安者。知所當務。不得不曲比旁喻。反覆叮嚀。期其猛省

驟悟。早圖轉身退步之計。天下之羊復多矣。真羊雖少。虎而羊者尤多。只爭班紋未現。爪牙尙鈍。虎雖眈眈環視。未卽競前攫搏。肆意吞噬。祇因羊隻雖多。未若虎勢之衆。旣不能遂吾擇肥。復不能從其折腿。將慮一舉皆動。爭競剽奪。至於互相殘類。嗟乎。虎有勇而無謀。使其苟有術。變羊爲虎相比類。復有術。變虎爲羊相牽制。則天下皆爲騶驢之仁獸矣。雖曰談固易易。行殊難也。余曰。在人則難。在天則無所謂難。不觀夫日月諸星。無懸無托。皓皓悠悠。循時歷序。繞行空際。卽使造物欲添一地球。亦祇多增一顆星已焉。詎可以井蛙限量。妄測彼蒼橫徑。夫虎固無術以變羊。人幸有智以舉廢。今欲使利鈞勢平。人不相殘。國毋凌替。要當體天行道。捐

資設教。俾弱者知所以變強。猶望羊之知所以變虎。蓋國之由弱也。皆因教無天道之學。人失辨識之能。所以政治幽僻。綱紀失緒。欲期其強能自立者。又扭於不預人之政教。所以羊終爲羊。虎仍爲虎。世有不善喻者。謂羊虎異類。人非造物。焉能變化若斯之巧幻。余不能不反覆明告之曰。羊虎者。比人之強弱。喻國之廢興也。變化者。政教也。造物賦畀。原期人之向善。無奈人惑魔孽。賢智自命。豺狼成性。耶穌丕降。原稱大牧。意爲護羊之將噬者。特因猶太之剛愎。報使由盛而衰。如虎之變羊。以愧其本賢智。而卒駕馭於不智。嗣因西人之虛心。報使由荒而盛。如羊之變虎。以彰其本不智。而能驅策夫賢智。嗚呼。天旣以靈性賦畀。豈不欲人賢智。其若

人之無良。一朝得志。而更忘天。所以天不能不以羊羊虎虎之輾轉。以懲愚。愚智智之靡常。以驗其所謂上帝前。無人得自誇。有國者。其可不讀西經。藉察天道之所以循環。賢智之所以退聽。周秦之所以修短。禮義夷狄之所以倒置。是則管子所謂。不修天道。不鑑四方。有家不治。辟若生狂。衆所怨詛。希不滅亡。夫管子所謂天道者。乃臆斷之理勢。非今之顯效明驗之天道也。以臆斷之理勢。尙可引鑑修省。况夫顯效之明驗者。詎可肆意憑陵。所以然者。豈非畛域扞格。皆由人失辨識之明。今欲使其強能自爲牽制。非於傳教之外。仿行噴室日報。以啓人之智慧。造人之辨識。示人之廉恥。勉人之志氣。安能起人之孱弱。振人之委靡。解人之幽僻。導人

之正善。然則何謂噴室也。當齊之盛。桓公問於管子曰。吾欲有而勿失。得而勿忘。其有道乎。對曰。時至而隨。毋以私好惡害公正。察民所惡以爲戒。黃帝立明臺之議者。上觀於賢也。堯有衢室之問者。下聽於人也。舜有告善之旌。而主不蔽也。禹立諫鼓於朝。而備訊喉也。湯有總街之庭。以觀人誹也。武王有靈臺之復。而賢者進也。此古聖帝王所以有而勿失。得而勿忘者也。桓公曰。吾欲效之。其名云何。對曰。名曰噴室之議。法簡而易行。刑審而不犯。事約而易從。求寡而易足。人有誹上之過。謂之正士。內於噴室之議。有司執事。咸以厥事奉職。而不忘爲。此噴室之事也。桓公曰。善。嗚呼。此三代所由隆。齊桓所由霸也。自後言路壅塞。江河日下。秦漢以後。

所以相懲亡也。不謂英雄所見略同。西人遠在數萬里。世後千百歲。更能默會噴室之風。行日報設議院。振興丕業。豈非其能遵耶穌事上帝。天亦厚牖其衷。使其閉戶造車。出門合轍。不然。三代之審矣。何至後世禁之。致相懲亡。豈因其居命自用。天特幪蔽其耳目。閉塞其聰明。使其反先爲後。耶穌曰。我爲審判臨世。使不見者得見。見者而反爲瞽。蓋亦有所寓而言也。今之瞽者。亦殊多矣。余所以滔滔絮絮。將期先得月者。登人以樓臺。使人由明而見道。方免爲山九仞。工虧一簣之憾耶。

擬上萬國籌安策下

夫西人之有今日者。何嘗不知皆由斯道。亦何嘗不知道在必傳。

此以故通商不離傳道。無奈強鄰迫處。勢利堪虞。不得不以全副心機。戮力經濟。久而久之。反忘道之所道。畢竟視道如贅癩矣。使非國中有如許講堂噴室。以提撕維繫。欲求其不相殘亂亡。豈能得乎。可見學校造人之益。有如是也。今欲致鄰國。強能自爲牽制。非贈行噴室日報。則毋以爲也。推行之之法。凡國之弱足以牽動他國之戰爭者。若高麗。臺灣。暹羅。與夫國較大。而弱等於斯者。必因時制宜。或就其都會。或擇尤之碼頭。廣設此項報館。聘請該地博達精明。善德能文之君子。秉筆幫稿。法倣上海申報之格。文仿自西徂東之體。專門一家。特論盛衰存亡。達窮榮辱。得失利害。是非邪正。天人物我。變通因革。首任縱橫著述。指陳議論。末重警惕。

告誠鼓勵勸勉。以示木本水源歸根天道。舉凡有益世道民心。無害天理人情。不拘成格。不限字數。或寓言譏諷。或婉詞諫諍。或新聞政事。或京抄電報。或別家之要論。或外來之佳作。不拘中外。不厭雅俗。苟有一技之長。或一句可采。何妨更正之。潤飾之。或借其機。以發吾論。或譯其文。以公同志。人孰肯埋才。士孰肯藏智。苟能虛心採納。隨事調劑。或敘述其由來。以彰其美意。或附識其議論。以廣其招徠。亦可藉察賢才之起落。風氣之轉移。方不失新報之用意。不觀夫管仲之明也。相桓公。霸諸侯。一匡天下。而民稱焉。及其晦也。而遭甯戚浩浩之欺。受婢子育育之辱。無地藐少賤之由致也。諺曰。一人之智有限。合國之才無疆。況今日者。聯五州爲天

下。可謂大矣。併中外之人才。可謂衆矣。且也。乃以普而得名。削以魯而見稱。由此以觀。使離婁師曠調換其操。未必方圓五音。依然若是其明巧也。詎可特吾擅錦繡之文章。而藐人無金石之議論。更不可囿吾說之不行。而度人之議論亦將落寞。此所以外國報館。名曰主稿。實則鑑衡外來之文論。按關繫之重輕。定酌金之厚薄。以其能廣收溥采。而閱者亦思先覩爲快。何怪其利市三倍。總之所擬之局。事屬創始。或日日刊發。或七日一度。要當按埠挨戶。派送贈閱。繼而臨時觀局。減價賤售。賠錢作嫁。務期普行遍布。以示同仁一視。實益均沾。人非草木。至誠可感。依此行去。未有不化行俗美。富強立致。名雖變羊爲虎。實則變虎爲羊。或曰。近今亞西

主津新集卷參
亞洲各大國。亦有仿行西法。創售日報。雖館數無多。亦可藉開風氣。何須岌岌。必倣秦西。勉強務多。余曰本地日報。維新之說。格不容入。守舊之論。則又獨當一面。其間卽有畧陳取法變通。亦惟軍藝利權已焉。曾無一道及當修夫主腦廢興存亡之政教者。此余所謂限管窺班。難期一竟全豹。天下之大。品類之繁。其間尙有如許可驚可怕。視不見。聽不聞。摸不着。摧不脫。之莫之爲。莫之致者。詎能以一斑概乎。其次卽有各教月報。統而計之。猶寥寥如晨星可數。况所論大都教中奧義。縱有一二切中時宜。亦祇太倉一粟。焉能遍及數千萬里之地。幾百兆姓之民。且眼前風氣未開。富者旣吝。則中戶人家。孰不視財如命。矧夫農工傭役之輩。謀生尙慮

不給。又何資從事他顧。需錢閱報。傳行自然不廣。不廣則風氣何由而開。積習何由而脫。智識何由而來。富強何由而致。牽制何由而成。太平之局。何由而臻。持盈保泰之基。何由而立。或曰。此論誠足以破千古之迷。闢中外之惑。善則善矣。然而經費孰出。主理誰何。余呵然失笑而對曰。孟子且云。惻隱之心人皆有之。若夫水旱災祲。與人無所痛癢。且一紙書。而致中外捐積幾千百萬。方且抱愧嫌。少禮曰。父仇不共戴天。則孔子雖云。殺身成仁。要惟各親其類。未若彼爲耶穌者。恩必及敵。今日之事。爲統籌天下太平全局。凡共此覆載者。無一不同合舟。而共休戚。紙價旣賤。區區一館之設。經費按年少可數千。多止數萬。或美國政府專理。或英國皇家

分肩。抑德國公家共任。歐美兩洲。富甲天下。素稱禮義文物。其間豈少疎財重義。德富兼備之君子。有一踴躍需將起而應之足矣。安見乎經費之難籌哉。此所謂潛移默化。以鈞利。挈長補短。以平勢。若曰主理其人者。或林君樂知。或花君之安。或李君提摩太。如而人者。皆足以比肩分任。余自知言過。奈身既屬道。豈能自愛。所願同志之能西文者。譯布無論何國。縱使言不能行。亦可藉斂天下之強勢。未始無補。夫華人之謀生異國者。稿甫脫。適海外逸人遇謁。出而質之。讀竟鼓掌而笑曰。是真當世。蓋世。匡世。之奇作也。子亦殊苦矣。但使天下之人而虎者。一見而不驚魂。則其必非由父母而出者。使夫虎而羊者。一見而不奪魄。則其必非由血氣而

生者。更使夫與有關碍此間之議論者。一見而不知克己自修。則其必非生同禮義王化之者。僕料斯論不刊則已。一刊必行。否則天下無復謂人世矣。惜乎斯文落在斯間。縱使譯而質諸倫敦報館。獲酌賙賑。豈不望其多多益善哉。

必上

有某學究者。自許學貫天人。素喜以無根基孤搭課徒。一日適滄浪孺子。避雨來投。見案上以單必爲題。傲諸門人作論。坐間有老於塲屋者。駭絕歎爲棘手。獨孺子毅然以口代筆。應之曰。滄浪之水清兮。可以濯我纓。滄浪之水濁兮。可以濯我足。狂風暴雨飄零別爾遠兮。疑其祇可與濯足。學究曰。誰要爾歌耶。孺子曰。吾野人

也。近於滄浪。而長於歌詠。姑爲問水。不敢必其清。故歌曰。祇可濯足。旣欲吾論。不能不勉強承命。於是再應之曰。吾之所以歌兮。是知事之未必。誠人之何必。勉人之不必。蓋必之爲義廣矣。道之固然。理之當然。是皆造化之使然。是故天能爲莫之爲。而後乃必。人不能致莫之致。則無所可必。無可必。而欲強之必。是未必也。所以孔子曰必也。臨事而懼。是懼事之未必。故曰好謀而成。是事有未必。成在務謀。非若暴虎馮河。死而無悔者。但知有必。不知未必。但知必己。不知必人。但知必賢。不知必天。因是而目無瞳子。眼空一切。恃己聰明強健。必人而皆疲癯殘廢。曾亦一致思吾之祖宗先代。詎能無一罹於斯病者。誠若此。安能必吾子孫後代。不有生帶

殘缺。而甚於瞽聾瘖跛之者。又不問吾之推己及人。其果不愧夫天下之所謂聰明強健。而兼有怵惕惻隱之心者乎。更不可恃吾身爲士農工商。必人而皆娼優隸卒。曾亦一致思吾之祖宗考妣。詎能無一蹈於斯境之者。誠若此。安能必吾子孫後代。不有賤甚而爲斯人服役之者。又不問吾之職稱藝能。其果不愧夫天下之所謂士農工商。而能淫巧奪天。獨擅利權者乎。更不可恃吾殷富尊顯。必人而皆貧窮困阨。甚於狗盜乞丐之不若者。曾亦一致思吾之祖宗先代。詎能無一身歷斯境之者。誠若此。安能必吾子孫後代。不有遭際慘苦。而甚於鄭元和伍子胥之者。又不問吾之接物待人。其果不愧夫天下之所謂殷富尊顯。而能樂善好施者乎。

更不可恃吾賢智才幹。必人而皆蠢笨愚頑。甚於犬馬之不若者。曾亦一致思。吾之祖宗先代。詎能無一賊畀下愚之資者。誠若此。安能必吾子孫後代。不有癡呆鈍鹵。而甚於狗彘不若之者。又不問吾之抱負經濟。其果不愧夫天下之所謂賢智才幹。而無名實相背。粉飾虛銜者乎。更不可恃吾身生禮義王化。必人而皆蠻貊夷狄。曾亦一致思。吾之祖宗先代。詎能無一出幽谷而遷喬木之當日者。誠若此。安能必吾子孫後代。不有再出禮義。而入夷狄之者。又不問吾之風俗政教。其果不愧夫天下之所謂禮義王化。而能風行俗美。富強鼎盛。以提撕天下者乎。學究曰。子悞矣。以上所論。似甚淋漓痛切。惟末段兩句。未免狼狽失洽。蓋祖宗爲夷狄事

誠有之。如孟子云。舜生於諸馮。遷於負夏。卒於鳴條。爲東夷之人。文王生於岐周。卒於畢郢。爲西夷之人。則此可知武王周公。及成王以後。又焉能一免爲西夷之後裔。此是彰明最著。不但吾輩讀書人。莫不共感其教化之遺澤。而孔子亦云。匹夫匹婦。未有不被堯舜之澤者。他如古之所謂南夷。北狄。交趾。犬戎。諸羌。即今之所謂滿州。蒙古。西藏。奉天。陝甘。雲貴。諸邊省。一旦用夷變夏。無何而天下一家矣。所以曰。四海之內。皆兄弟也。若曰。不能必吾子孫後代。不有再出禮義而入夷狄。是豈將來真有再下喬木而重入幽谷者乎。孺子曰。子讀書人。自然居爲後進之君子。固知守經。不事講理。余爲學道者。猶先進之野人。自當講理。不敢守經。人之所貴

者。在有三良。良知。良能。天良。三者闕一。何異於禽獸也。道之當然。理之宜然者。元始化工。創世造人。豈非載之以土地。布之以四方。立之以都國。同一造生保養。初何嘗別其爲夷。爲夏。爲蠻。爲貊。猶之慈父愛子。但求其孝順。而厚之以私產。無限於長幼嫡庶也。故曰上帝無親。惟德是輔。人之所以榮辱。國之所以盛衰。甚於顛倒夷夏。是天之警告。無奈世不知恐懼修省。卒至葫蘆倒置。天道逆行。又何裨於用夏詛夷之徒然哉。朔自海禁以前。四境之外。莫論東西洋。概以夷狄稱之。因此莫須有之字眼。令人飲恨刺骨。卒至齟齬肇釁。自貽捐軀失國。史不勝載。故自通商以後。風氣暫開。英即曰大英。法即曰大法。俄即曰大俄。美即曰大美。舉凡通盟使。執

玉帛。往來交際。莫論國之大小。概須加大優稱。以示禮義王化區別。所以日本國。稱爲大日國。日本人。稱爲大日人。無復倭奴。倭國之相詆也。乃昨讀上海麥吉利西報。長篇大論。謂日來中日啓釁。政府行文。復大書特書。倭奴。倭國。以詛日人。殊失上國體統。意者。狐兔有類。此等無所謂之字眼。亦祇惹禍招尤。每能激成公憤。不然。狹路相逢。冷殺孤客。死者又不知怨從何起。仇從何結。況於戰陣上。求其免重傷。活二毛。殆不能也。此所以秦之焚書坑儒。議者至是仍是非參半。詎非平日自種口孽。安有慘烈若是之殊甚哉。愚謂與其種口孽。肇釁端。上累生靈塗炭。下貽海客捐生。孰若泯去惡習乖僻。移此精神。作經濟工夫。無事之日。講求藝術利權。有

事之秋。於陸陣上。多奪兩個城壘。水師中。多俘數條敵艦。不更愈哉。

必下

說部云。天生人情罷了。何必情短情長。可見人各有天良。雖情之所鐘。尤不敢必天之畸輕畸重。况欲咎天之不薄夷而厚夏。豈不更曰。天生東海罷了。奚必多此三海之累哉。此適因談必而類及焉。不然。子自謂讀書人。何至不知書。所以然者。疑所讀莫非四書五經已焉。其他史鑑子書。恐未甚瞭瞭。職是而不知有喬木幽谷之往來。夷狄諸夏之出入。非然者。既知舜爲東夷。文王爲西夷。自當努力學史。再進堂奧。講究五帝夏殷周本紀。與孔子世家。便知

道統中。所謂堯。舜。禹。湯。文。武。周公。孔子。亦何一不爲黃帝之子孫。史無明文。徵軒轅爲夷狄。則其必生長諸夏明矣。何至後世稱其子孫謂東西之夷人。詎非顯徵喬木幽谷。可以恒往來。夷狄諸夏。可以長出入。否則黃帝之於東西夷二者。必居其一焉。更有徵也。文王諱昌。其祖曰古公。公有三子。長曰太伯。次曰虞仲。少曰季歷。季娶太任。生昌有聖瑞。公曰我世當有興者。其在昌乎。太伯虞仲。知其將立季。以傳昌。乃二人斷髮文身。亡如荆蠻。則此可知下喬木入幽谷者。古之有常矣。非吾之創論也。况禮之所貴。帝且深居簡出。后妃嬖妾。更不待言。而乃師兵爲營衛。遷徙往來無常處。妃之貴者。若簡狄。姜嫄。諸婦。或結隊而浴於川。或徒行而遊於野。以

至吞玄鳥之卵而孕。或踐大人之跡亦生。則其不夷而自夷矣。何待後世夷稱其子孫。總之夷狄諸夏。差短在遊牧都國之相異。聖人所以制禮設教。特欲天下向化來賓。胥相綏安。非欲多此諸夏夷狄四字。爲後世釁由罪孽。孰意世衰道微。孔子始歎夷狄之有君。不如諸夏之亡也。註曰。中國有君上。反不若夷狄之亡君上。可見教在得其所道。無關夷夏之殊別也。不觀夫戎王使由余觀秦乎。由余其先晉人也。亡入戎。能晉言。繆公一見。而示以宮室倉稟。由余曰。使鬼爲之則勞神。使人爲之亦苦民。繆公怪而問曰。中國以詩書禮樂法度爲政。然尙時亂。今戎夷無此。何以爲治。不亦難乎。由余笑曰。此乃中國所以亂也。夫自上古黃帝作爲禮樂法度。

身以先之。僅以小治。及至後世。日以驕淫。阻法度之威責督於下。下罷極。則以仁義怨望於上。上下交相怨。而相篡弑。至於滅宗。皆以此類也。夫戎夷不然。上舍淳德以遇其下。下懷忠信以事其上。一國之政。猶一身之政。不知所以治。是真聖人之治也。繆公忌其賢。留用其人。而反饋戎王以女樂。猶之魯使孔子。適周問禮。老子贈以言曰。聰明深察。而近於死者。好議人者也。博辨廣大。危其身者。發人之惡者也。夫人之遣使也。或觀光。或問禮。其來之誠也。有如互鄉童子之見。是將有所以取式師從者。若必一以贈言。教人詭譎。一以女樂。問人君臣。是殆夷狄不若者。尙可以表率。夫所謂諸夏之有禮義王化者乎。世無帶衣冠而投生。可知上古皆爲處

荆榛。之與鹿豕遊者。是則今之所謂達人君子。豈能一免爲昔之裸裎血飲之子孫者乎。佚詩嘗云。王侯第宅新主。文武衣冠易時。勢之徙移也。勝者爲王爲帝。敗者爲盜爲寇。豈能以諸夏夷狄四字。確斷其爲主客賓東。所以史筆雖剛。亦有摧秃之一日。况欲恃吾能多讀兩行書。先認幾隻字。便自許爲文人學士。若宋儒者。察其所學。無非名利。究其所務。不外朋黨。及至大敵臨境。王室憑陵。亦惟面面相覷。思逃偵遁。卽有一二見虜被俘。從容罵敵。慷慨捐軀。亦不過捐此數條必死之殘命。售此兩字無謂之夷狄。夫豈有補於山河沮落。社稷摧殘。坐井觀天不泯之遺臭哉。此余之所必者。必人而泯去畛域。不必動輒。以莫須有之諸夏。與人碰無所謂

之夷狄。蓋不知其所以詛人者。適所以詛己。而詛祖宗賢聖。嗚呼。所謂明教罪人者。其斯謂乎。學究曰。聖人所以造字者。有字必有用。依子立論。是欲將此夷狄字樣。一概抹去也。終應之曰。天下未有不學而能辯者。子稱學究。是自鳴爲學貫天人者。大學云。蓋人心之靈。莫不有知。惟天下之物。莫不有理。理有未窮。故知有不盡。先聖創字。使人紀事觀感。非欲人以字相詆譏。蓋詆譏則起爭競。爭競則尙傾軋。傾軋則生禍亂。禍亂者不治也。因是孔子疾沒世。而名不稱。故曰夷狄之有君。不如諸夏之亡也。斯言者。謂世衰道微。諸夏之有帝王。較不若夷狄之亡君上者。用是觀之。禮義在所教。夷夏在所化。詎能以文理限定其位次哉。所以大學曰。唯仁人

放流之迸諸四夷。不與同中國。於以徵。孔子傷時嘆世。思乘桴浮海。爲居九夷之不謬也。是孔子亦自知不能必夷而遜夏。嗚呼。居是邦。讀是書。而不自愧。於不能舉一反三。畢竟偏爲好人之所惡。惡人之所好。求其蓄不逮亦幾稀矣。

說兆上

有號棘人者。一日居休。客顧而問曰。方今凡宇紛擾。遍地鋒鏑。先生亦知何時有昇平之一日者乎。棘人曰。子來問兆也。嘻。兆之爲言廣矣。余一市儈。旣非山居。又未野出。生不見祥麟。老未覩瑞鳳。則有奇禽異獸。入肆供宰。且不能辨其何者。謂雌雄貴賤。又胡能語子以兆乎。客曰。僕一窮人耳。隨在盡可爲家。到處便是棲止。惟苦兵燹之來。卽能先事奔逃。藉免戎馬征塵。劫擄焚殺之慘。亦將不免扶携遷徙。廢時失業之憂。况地方擾攘。盜賊蜂起。風聲鶴唳。米珠薪桂。卽能幸脫兵刃。亦將不免流爲餓殍。其所以爲天下。抱杞憂卜昇平者。稔知先生。素稱君平之惻隱者。故卒爾冒瀆。棘人

曰。夫兆亦難言矣。若曰有。何仲任確衡其必無。若曰無。何古人互徵其必有。此所以河圖。洛書。靈芝。醴泉。載謂祥瑞。按經據典。卽有此項異兆。大都見諸昇平之末。非見諸昇平之初。由是觀之。是昇平在先。祥瑞在後。又安得以異兆。據爲祥瑞。方今天下紛紛。世界擾擾。不見則已。一見恐非祥兆也。無已則有一焉。敢請畧爲子告。天下事未有極而不反者。自來習俗之惡。風氣之劣。未有甚於此時者。人事若不轉移。是必世界之將滅也。又安望昇平之有兆哉。客曰。說雖如是。惟否極泰來。天道循環。未有不若是者。請以何所據。而云世界將滅。且應見何事。方是昇平轉機之日。棘人曰。則以子所行而論。家過中人。未謂貧也。而自諱爲窮。卽無良田萬頃。比

戶是業。然兒孫繞膝。不耕而食。是有繫累者。人散人也。又謂隨在爲家。到處棲止。豈欲效陶三徙。抑懼政陰飭。故作是言耶。謙恭乃爾。燭見世風之壞。可謂極矣。他如昨讀申報。罪言一則。初以謂是必滿篇荆棘。句句刺譏。孰意經一展誦。則字字金石。頭頭是道。竊嘆斯文也。使余而有鑑衡之職。必顏之謂箴規。而人反標其謂罪言。噫嘻。世道若不遽變。未幾將有以人而稱畜者。物腐蟲生。弱肉強食。謙恭如是。何怪彼強而有勢者。不更當吾爲螻蟻魚肉哉。舉國而盡爲螻蟻魚肉。又焉望其能有志。以制敵國外患。不能制敵國外患。則勢從而歛焉。歛則不立。是人道故爲不平。安望世界能有昇平乎。子果欲見昇平。惟有虛心忍耐。靜待夫世之所謂日報

者。一例馳會默約。遇事據理直書。務諍尙諫。勇諷敢譏。毋賂賄。毋誇張。毋粉飾。毋隱諱。善抑己。樂揚人。有如是。則庶乎可慶。昇平之有兆矣。其次。再觀夫風俗驟變。如衣冠尙短束。尊賤不別途。公門汰徭役。道路撤鳴騶。大辟不坐株。官債無波累。君上恥佛老。百姓趨天道。男人禁嗜鴉。女子廢纏足。隨在有西塾。到處尙拜堂。誠有此效。則昇平爲期不遠矣。客曰。斯乃先生常談之政教。兆云乎哉。當此世衰道微。人趨勢利。政尙苟安。焉得何時能有是事乎。棘人呵然而笑曰。夫政者正也。教者化也。教化不正。安能致國昇平。余爲是言。猶醫者能驗病以方。胡能愈人以期。况權非在我。且速則不達。子胡急急若此也。諺不云乎。好事多磨。雖曰爲時必久。然較

諸無了期。之河清海晏。不猶速而又速哉。子果不耐煩。姑誌斯言。遺諸兒曹。且教使鑑觀普天下之徼昇平。幸禧誠者。未有不先得斯效。而能臻富强。亦未有不先富强。而能臻盛世。其或天意徙回。人心尋轉。廉恥視重。天良激發。不久當有見諸實事。亦非人所能逆料也。客曰。僕知之矣。欲臻富强。誠易易也。何須曲引旁喻。多所周折。天下事。所病在因循虛演。但使實事求是。陸則增額兵。水則廣舟艦。凡西人新奇軍火。靈巧戰棋。或購或製。加之日日打靶。時時訓練。水陸咸備。金湯胥固。又安患有不富强哉。何須苦苦。必欲政教吏治更張爲哉。若待先生立論所行。是天下了無昇平之可期矣。棘人曰。子所論未嘗不是。而所求亦殊易易。惟經費倍蓰。所

得祇僅昇平之皮毛。此是拗強之道。間惟受化未全者。如俄羅斯。土耳其。尙行之。故恒有內訌黨人之禍。雖強將無昇平之一日。外此所謂眞富強。而純王化者。若美。若英。若德。無一不先從事吏治政教。以締天心。結民志。胥是道者。於是乎獲稱全盛。野諺曰。上天說價。落地還錢。又曰。按劬論兩。就錢購值。塵法如斯。權政何莫不然。子問昇平。余豈能以偏平對哉。客曰。自來有偏安。未聞有偏平也。其亦有說乎。棘人曰。怪哉。子未聞是典也。斯乃近今不便之通號也。夫偏乃不正之稱。偏平者不正之平也。近者如香港。遠者若金山。大者如印度。小者若安南。凡徙阨就平。駕平治阨。若埃及者。國爲土奪。土不能之治。乃必藉英代攝其政。諸若此類。皆謂偏平。

客曰無恥孰甚。亦可謂羞平。辱平。豈但偏平已也。談次時近薄暮。客興辭。棘人約以夜來再會。以竟其說。客唯唯而退。

說兆中

晚飯後客冒雨挑燈而來。棘人鼓掌而笑曰。子誠信人也。是無蹈於有約不來者。無已亦一昇平佳兆之可賀也。客駭然問故。棘人曰。今天下尙譌詐欺虞。雖誓盟插血。朱蹟未乾。而兵戎又見矣。况欲闔巷之人。若吾輩者。求其執言諾。守孚信。則惟今夜見之於子。謂非佳兆而何。但便盡人皆如是。何患天下不昇平哉。是所以政教吏治當修者。其在國無天道神理之學。人失誠懇孚信之明。至於削弱窮極。尤不知自反。可勝嘆哉。無徵弗信。請以現事質之。如

昨閱申報。論漢口巡捕毆人致斃一事。亦可概見風之靡。俗之頹。有如是也。其詞畧曰。漢口常有巡捕毆人。昨報考生被毆。至今凶手未獲。可謂暗無天日者矣。豈西人工部局之例。亦因地而施。本無一定者耶。前者漢皋友人。貽我雜佩。中述一事云。端陽佳節。漢口印字館。庖丁某甲。醉飽之餘。至英界遊覽。忽解衣小便。爲華捕某乙見而阻之。始而口角。繼而爭持。乙不敵。遂吹警機。衆捕聞之。蜂擁而來。將甲圍在垓心。拳足亂加。甲重傷伏地。衆始鳥獸散。館中人得信。昇歸祇存一息。越二日而斃。甲父遂與巡捕爲難。巡捕見係人命關天。出番佛一百五十尊。始得寢事。又曰。噫。華人之不可用。乃如是耶。巡捕之例。地屬何國。則歸何國設立巡捕。以爲捍

撤之資。萬國公法載之。各國遵之。獨中國不在此列。故雖中國之地。一經租與洋人。爲通商之埠。卽任洋人設立巡捕。洋人所用巡捕。均係西人。漸漸攬用華人。至今則華捕多於西捕矣。然西捕多知規矩。生事闖禍絕少。概見。華捕則常常有之。充此職者。大都無一衣冠中人。又未嘗學習。全然不知規矩。此等人。一經爲捕房所用。豈自視如紅帶子。黃帶子。作威作福。倚勢凌人。平日一飯之恩。未必盡報。而睚眦之怨。則無不盡復。居恒不敢吐氣。至是一揚其眉。大有趾高氣揚之態。見勝於彼者。則生忌心。見不如彼者。則生侮心。以是橫行街頭。龐然自大。且其威悉行之於華人。見西人則屏息不敢動也。正不知其所爲者何事。吾因而知。中國傭人在外

顧狐兔。不守大義。何怪夫迫於饑寒困苦之輩。能不爲敵作諜。倒戈降仇。種種醜事。媿端重疊。頻見以至喪師辱國。致及異域借材。鄰將掛帥。嘻。無乃遲乎。况大厦豈一木能支耶。借使漢納根。別有神通。以憑部下將士。默會機宜。驅敵出境。加又振旅渡海。興師問罪。不但非中國之榮。而祇徒增中國之辱已耳。否。豈數百兆蒼生之中。曾無一能充漢君之職者。謂必舍己從人。是亦平日不能以優待漢君之禮。以待國人。更不能以漢君所受之教。以教百姓。職是不但倉猝無人可來。即有其人。亦無謂於來也。否。豈漢君非由父母血氣而生者。抑真有三頭六臂之可異哉。假令漢君生長中國。學共詩書。而不爲葉衛丁方之一流者。幾稀矣。是今日之用漢

君不勝則已。使而勝也。不但無以箝天下之口。亦無以服國士之心。嗚呼。侈談借材。不事變通。吏治政教。何異棄飯以呼饑。擯衣而號寒。又曰。天實爲之。謂之何哉。嗟乎。天豈教人如是乎。既不教人如是。亦何嘗教人不變通。吏治政教。而必別取材於不同吏治政教之異國。不亦冤哉。於時談興方淳。忽聞魚更三漏。客乃告別。棘人期以明日再會。客許可而散。

說兆下

越晨客踐約而至。棘人大悅。讓坐。莞爾笑曰。子誠可教也。虛心乃爾。可謂人中之傑者。苟能慎始克終。庶乎離道不遠矣。客曰。夜來辱承青誨。茅塞頓生。但爲更張政教一論。歸去悒悒。終夜不能成

寐。今早特來重聆大教。以匡不逮。棘人曰。夫教爲義殊繁。而說亦非易易也。在吾人總謂舉天下之教。未若中華之善。更視他人之教。謂異端之可鄙者。惟自西人觀之。尤謂中俄土三者。應例受化未全之國。故必以其教傳於此地。此其間所見懸殊。固有霄壤之判者。其在各是所是。若衡之以大道。評之以公理。一旦相形見絀。未有不是非立見。美惡盡致。况彼鄙人不全。是其自銜謂完善者。吾若一味混淆苟過。不絜吾之所善。較彼之所美。加以切磋琢磨。評校修刪。使各歸完善。亦無以顯吾之禮義。彰吾之王化。不逕乎此。一任浮沉自若。執謂人非吾是。不屑與辨。誠如是。不但不能爲明教爭氣。甚非忠恕待人之道。苟能駢參互較。萬一彼長此短。彼

是吾非。何妨取其道。以修吾教。從此溷天下爲一家。慶禧年於樂歲。詎尙有害於義哉。何須苦苦。必以不真知。無確據之諸夏夷狄。執爲定案。徒使無知之徒。相與拮抗爲仇。以致闖禍釀事。殺害頻仍。小者或可賠錢了事。大者必至稱干比戈。通商數十年。風氣如昨日。責成天下秉鈞教職者。曾無一肯權衡此間之利害輕重。豈謂神道設教不足憑耶。抑佛道可以勝天道耶。抑人理可以駕天理耶。抑真能各執各是。毋須變通求乎止於至善耶。抑確能混淆苟過。不致再有齟齬決裂。至於不可設想之一日耶。孟子旣曰。僻則爲天下僂。是明言道在至公。理出大衆。若違公逆衆者。必至爲天下所僂。讀是書者。當如何誠謹。以察道窮理。棄僞宗真。舍經從

權。方不失爲禮義文物。而乃一旦微倖成名。反棄經書如蔽屣。如昨爰申報云。中國之人。固不可爲外洋所用。以致自召其侮。果如是。豈不更曰。聖賢之書。固不可爲中國之人所讀。以致反遭其棄。若曰。可以各是其所執。各行其所教。何必孔子曰。後生可畏。焉知來者之不如今。又曰。三人同行。當有一師。擇善則從。不善宜改。聖人先知先覺。又何等仁明謙恭。勉人待賢待教。吾何人斯。安得目無天下。居命位置。不事衡道察理。徒以待師聽改之道。抵死與人爭競角逐。起孔子質之以時事。而不被斥。謂明教罪人。我不信也。若曰。不必守此臥碑。躬能爲治。又何必讀此經書爲哉。夫道之當衡。是欲窮理之未明。究事之費解。以求純乎臻善。茲若暴棄自伐。

是真所謂愚不可及之者。今有客焉。蒙垢行於孔道。見者笑之。其人將不稍駭。或告之曰。嘻。何而左頰青。右頰白耶。其人仍從容以行。途人咸疑其狂。或尾而嘲之。或遶而誑之。須臾壅積如山。自晨至暮。不能解圍。好事者。察其應對一如常人。憐其固執成性。於是畀以鏡。既鑑。方知其非。至是廢時失業。悔亦晚矣。斯其小焉者。若以山河社稷。與人打燈虎。賭疑團。所得辛苦。所失不誠大哉。今日之爲耶穌來傳者。實則七十子欲求終憾。不可得聞之天道。而人反以必悔之賢智謀慮。相與捍禦拮抗。旁觀者方慄慄然。謂吾愚甚於蒙垢之過客。而吾尤以爲得計。此其得失相去。豈復有道里計耶。客曰。僕早知斯教足以莊尙者。在有天道。堪與師式。無奈一

且用夏變夷。羞亦大矣。棘人曰。天下所謂羞者多矣。秦漢之後。元明以前。其間數千歲。此中之破國滅身。遺臭史冊。如而人之可羞。可詛者。豈能更僕以數。今日之事。天實使之。不出乎此。必起於彼。非智力所可之逆者。是天必欲以其道行也。但使有國者。倡身作備。躬行接納。天下萬國。未有不額手慶頌。相率電賀。羞云乎哉。夫天下所共羞者。羞人之削弱。天下所共賀者。賀人之榮顯。安有自己榮顯。而肯賀人之削弱。所以然者。是知其將有一飛冲天之勢。早與周旋。以爲將來友睦之地。夫西人得以鞭笞天下。強人所難。欺人所不知者。莫非憑藉斯道。而其受鞭笞。遭驅策者。亦未有不悞與斯道爲仇。職是而至於鵠巢鳩居。弱肉強食。但使吾能改絃。

易轍。行其所同行。藉其所憑藉。而不臻昇平。告全盛。我不信也。客曰。我甚慙於先生者。惟在何時得有是事乎。棘人曰。人以富貴尊顯。視如浮雲。若高麗者。尤以神器大寶。當爲肥馬輕裘。一任日本轉徙推移。子自稱窮漢。何須岌岌乃爾。無已更有一可賀者。昨見申報有宜勝而後和之篇。間有句曰。召公之戒成王曰。祈天永命。祈天者。兢兢業業。克抑貶損。以安民保國爲心。體睦鄰柔遠之嘉意。收息民罷戰之美名。卽或有所設施整頓。於言和之後。尙未遲也。上下一心。勵精圖治。廓然一變。咸與維新云云。客曰。語氣慘淡。何兆之有。棘人曰。夫維新者。乃日本當時改正朔。革吏治。爲吾國日報所同聲共譏者。輾轉二十餘年。一旦顛倒見之。雖爲異族返。

誚譏遲。於吾而不謂兆。無乃狠乎。况一經申報肇端破口。安知將來不見諸行事。子亟亟問兆。余能不搜羅以對耶。

牽制難持

東亞細亞洲一局。說者總謂挾有通商牽制可恃。則不幸同洲之國出於戰。亦可藉歐西諸國鎮壓彌和。昇東亞之苟安者。得以晏然休息。毋須振作經營也。愚謂斯言惑也。試觀今者中日之釁。乃局外諸國袖手旁觀。謂皆遵守兩不偏助之義。一任顛倒糜爛。若於通商大局無礙。亦惟漠然置之。其故皆由東亞諸國不事經營奮修。西人亦蔑爲受化未全之者。以故公法裨益。未能使沾。而並同洲戰爭侵奪之事。亦不肯擅預。誠如是。則鎮壓彌和之說。不亦

託諸空言哉。雖曰。言係臆說。要非毫無所因。蓋當此天下爭雄之秋。慘毒軍火。日新月異。一朝構釁。血海尸山。慘淡情境。豈堪設想。職是而彼都人士。莫不惕然於心。設或一旦事機決裂。戒備從戎。雖有氣蓋世。而力拔山者。未嘗不躊躇至再。以期挽回萬一。無他。借使權操必勝。亦不免死亡相等。殘害生靈。暴傷太和。微但仁者不爲。而智者亦視等無謂。以故太西多仕。天良激發。頓起持盈保泰之念。無復傾軋刁釁故態。太抵天道循環。或者否極泰來之有兆。亦非人所能逆料也。經云。尸所在。鷲鳥聚焉。夫是而羊所在。羣虎焉能憩然置之。萬一東亞諸國。一味睡鄉忘返。廢弛依然。彼夫。人而虎者。能忍不擇肥而噬。一有是行。必羣起爭競。歐西之局。從

而糜爛矣。所以西人之顧慮綢繆者。倡始設立太平之會。會中人之防微杜漸者。又忘於疏河暢流。而徒欲塞口以堵源。擬將東亞一局。按爲各國通商之地。止准往來貿遷。不准侵疆奪土。如其不幸。亞之與國互起戰爭。莫論大小強弱。曲直誰何。勝敗興滅。歐西諸國。概不越俎過預。畀免波累牽連之禍。然而善則善矣。識者將慮朔望既異。則盈虧不同。求其必初一。無十五。而並上下弦。亦不使沾。勢不能也。是故說卽易。而行殊難也。但使此約若成。則歐西諸國。或可倣秦放馬歸山。鑄兵爲器。其於東亞一局。利害不更較前倍劇哉。何則。夫東亞諸國。所以悌惶戒備於歐人之侵奪者。猶羊之畏虎也。歐旣自盟不侵不犯。亞亦可晏然高枕而臥。詎非東

亞諸國之倍利哉。然則何謂乎害也。歐旣無權以憑陵亞洲之疆土。洲中人。亦悞謂晏然無事。毋復往昔之彌縫補救矣。間或同洲之狡者。包藏禍心。陰謀默備。一旦借端興戎。則莫論強弱大小。惟備與無備。相形不免見拙。當斯之時。雖欲諉言勝敗兵家之常。亦將不免獻俘納款。割地求和之辱。詎非亞之倍害於前乎。卽曰皮上一毛。何傷牛背。然而一日一握。十日一筐。久而久之。毛盡牛安得而生。或曰西人素稱執理重義。己且自勉不侵不犯。又安肯視人之割併侵奪。而了無路見不平之氣。應之曰。說未嘗不是也。西人極講情。極說理。極重義。無奈人將各偏其所謂義。各是其所謂理。何怪人亦各理其所理。各義其所義。此所以爭競之由來。存亡

之由致也。茲試設一譬曰。今有人奉使絕域。約三五同志遠游。既至也。而所見皆野陋粗俗。所遇皆刁蠻不馴。鬱抑無所消遣。或告之曰。境內多梨園。於是相牽往觀。所到皆齷齪難堪。終遇一初脫藉之拔萃者。彷彿若京班。經其地。則孔道通衢。入其園。則高臺峻閣。不第服飾麗都。粧璜鮮艷。至於觀目端整。舉趾合度。與夫神氣宛然。唱念風雅。庶幾伯仲京班。他如客座位置。供應茶點。臺閣軒昂。戶牖潔淨。椅棹燦爛。琉璃輝映。悉皆精緻絕目。出人意表。客至是。方歎吾都戲園不過是也。竊幸苦海中。遇此樂境。於是公餘輒往遣興。土人見客興高采烈。莫不追隨爭逐。園幾爲窄。事因客起。他班之忌奪其生理者。一日要諸途。謀與爲難。適旁之好事者。斥

曰。是皆不義無理之取鬧也。孰必不爾。傲人之所爲不事爭。人亦而趨也。噫嘻。觀劇事小。又何嘗無路見不平之者。况國之戰爭哉。乃一至評論。更是一翻說法。其故皆因人情好整而厭廢。彼同一樣出錢觀劇者。自然樂擇其所從。不但不管人之生理被奪。甚欲人爭奇鬪巧。以廣其眼界。此所以高麗被阨。竟無他國援手之者。良由政教吏治不修。啓人生厭。試問。但使天下人設身處地。若觀劇之客。使其自言孰者謂理。孰者謂義。詎不皆曰。吾從客也。能明乎此者。庶乎可與論東亞細亞洲之大局矣。今之魯衛高麗者。亦復多矣。何其不整。乃爾。安得重義若好事者。一棒而警斥之。使其退步一想。天下之大患。莫患於窮。窮者無也。無者是不能通於有。

但使通之。亦可藉有以濟無。有無通。於是乎權勢等矣。已之權勢既等。然後可以平人之權勢。今者賄索當路。則民瘁於政。成法難破。則士制於吏。且教又不以天道爲學。則才乏信慤之品。是未等也。未等則榮辱不與。痛癢無關。有無亦難通矣。嗚呼。教亦多術矣。毋已則有一焉。兼事鼎革政教。變通吏治。分民以權勢。通民之有無則可。否則毋以爲也。聖人復起。當不斯言爲謬也。

時勢盱衡

回憶往昔。竊貿易之餘暇。寫中外之流事。孰意居無幾何時。乃中日之釁開矣。鷓蚌之勢成矣。非必謂言者有先知。而料者無不應。要亦理之當然。而勢所必至也。上古世界茫茫。人稀地廣。故權不

牽制。勢免連衡。所以俄終爲俄。日終爲日。高麗終爲高麗。中國終爲中國。雖犬牙相錯。疆界未甚分晰也。今者。時遷勢徙。駕扁舟。涉萬里。尤謀奪人之土地。况欲執禮義。修玉帛。重申繼絕舉廢之遺風。冀無大併小。強吞弱。不能也。此所以利權必爭。尺寸必較。會盟插血。合縱連衡。皆爲固疆圉計也。蓋局勢轉移。毫釐千里。先鞭捷足。刻不容緩。是今日之效鷓蚌鬪高麗者。雖亦爲防俄計。然而巧則巧矣。以若所爲。是速俄急得漁人之便利。何則。俄既不得申於黑海。勢必折而高麗。使俄得志高麗。猶豺狼入羊羣。東撻日本。西攘中華。隨意擇噬。行見亞洲一局。將爲鯨吞殆遍。斯情斯勢。中國漠然也。卽有一二知者。無奈成法難破。孤掌難鳴。亦惟諉諸安命

退聽已焉。日本卽不然。因自知小固不足以敵太。戰慄恐懼。慮社稷將墜於強俄。不得不亟圖無定倖之基業。轉爲有常期之故國。其如限於地。促乎勢。旣無遠交可援。復無近鄰可靠。徘徊四顧。欲得磐立奠安。非取高麗擴充其區宇。勢不能也。無他。爲躡拒俄地步。豈敢謂得隴而將有望蜀之侈念哉。斯其困苦難言之情。非等閒可知也。今茲不幸。而與吾國構兵。錯在其不能預以隱衷利害。秘請當道。疏讓高麗。以恢廓其版圖。復仿普魯士與日爾曼之局。再說高麗併合爲聯合國。唇齒相聯。休戚相關。我知中國寬宏大度。斷不至待緬越而偏輕。視高麗而獨厚。是中國讓高麗。在一席話已焉。何至兵戎相見。而不顧俄將乘日之後耶。說者曰。高麗迫處

近畿。爲東三省屏藩重地。豈肯輕易讓人。曰斯誠迂論也。夫中國旣不自知蹈險。又不恤他人履危。是故高麗一局。名爲藩封。實等贅瘤。旣不肯干其政教。又不肯涉其吏治。一任委靡顛連。勢同喪家之犬。嗚呼。此等屬國。安望渠能作我崢嶸籓籬。顧我金湯門戶。况一旦遭阨遇變。必爲興師保護。調兵助剿。雖亦爲顧全大局。籌未嘗不善。試問此等困甚於喪家之犬者。欲使其踞險抗俄。而無爲摧枯拉腐得乎。高麗一失。日本從而繼之。此所以日人不獲已。而務先鞭捷足。奪取高麗。以爲拒俄地步。是高麗早一日贈之日本。則中國早一日得一臂助。蓋俄無南犯則已。使俄而有南犯。當斯之時。不但日應出兵捍禦。其爲東三省計者。益當分兵以援。其

後。中日連衡。於是乎東三省。與沿海一帶。藉以稍固。是今日之爭。殊無謂也。竊謂國之富强。在政教之鼎革。吏治之維新。此日本所以勃焉興也。中國既不肯效人取法。又不肯早併高麗爲行省。更不肯棄今日之贅癩。以收他年之臂助。情願坐窳成規。徒恃必悔之兵甲。勞師糜餉。以爭莫須有之虛名。置諸安危牽制於不問。不誠左乎。夫以不能成立之高麗。豈一固守成見之中國。能底爲保護哉。是高麗之失。且暮事也。與其將來失之於悍大強俄。啓其蠶食門戶。孰若今日饋之於小固之日本。畀開拓其疆宇。併合爲聯合國。使其力足以堵禦強俄之出路。不更愈哉。是今日之棄高贈日者。期收他年之有助也。簣土成山。資山爲助。斯之謂歟。難者曰。依

子言。是前此緬越之失。亦仍期爲助乎。余啞然失笑而對曰。緬越之失。失於英法。非此之比也。地有不同。勢亦見異。雖然不但不能相助。尤患其相侵也。所幸界在毘鄰。勢成鼎足。卽不相制。亦相忌也。兵法攻智。守拙。物理動利。靜害。人事行者多生。臥者多死。是故核不變。不萌芽。卵不變。不成雛。日月運行。歲序往復。莫非示人通變。所以阻於山者。必開路。隔於水者。必造橋。變則通。不變則不通。但使中國一變。而革政教新吏治。斯時也。民歸孚信。則財免監守。自盜。士盡誠慤。則戰無臨陣退縮。誠如是。兵不必罄國。砲不必盡利。失地皆可復也。域外尤可馳也。况區區高麗等屬之復。有何難哉。此係就時論事。嚮使中國與日本駢時一樣通變。不但免多此

一翻戰爭。亦免緬越見掠。琉球被奪。更免復有眈眈隣之將來者。偉哉。政教吏治。關係於廢興存亡也。西人知而純修以行。日人覺而則效以驗。獨我國言變者。偏於軍藝利權。若夫能致妨礙軍藝利權之吏治政教。明知不善。亦不肯絲毫更去。使賈長沙復起。質之時事。而不爲痛哭流涕。我不信也。孟子云。君之視臣如犬馬。則臣視君如寇讐。誠如是。則官之視民如陌路。安敢百姓自許爲國人哉。或曰。民之至誠竭忠。同仇敵愾。已形諸日報。安有隔膜怨慕之可慮哉。曰。合國蒼生。幾數百兆。胡可以數數之主稿。錐錐之筆峯。斷盡兆情之趨向。余於是乎。有言必規。執事兼修政教。言豈苟哉。

多事

怪哉。世嘗以言事者。責謂多事。曾亦一思。人孰不知務緘口慎言。以省事。無奈彼自謂省事者。常於無事之中。突擾一事。人見其事之非。急欲平之。不能不立一論。以辯白其非。使其由非而轉是。乃一經如是。則謂人爲多事。彼反自詡爲省事。余於是於多事之中。再一定省。方嘆省事未必爲利事。多事未必爲害事。要知所以多。所以省。然後知此間利害所在。若一味省事受害。孰若多事之爲利哉。况處同大塊之上。既不能禁人不之多事。安能處己於省事。而讓人以與吾多事乎。苟能比較究竟。便知多事還是利事。省事反是害事。若曰。多事是害事。豈不又欲怪化工造物之多事哉。夫

多事之誠。是防政也。但使政不厭事。雖任作何多事。要無一不爲
利事。何則。事不患其不利。只患其不多也。蓋多則備選者衆。吾於
是乎由衆多之中。擇一善而尤利者。棄其餘非之害者。自然多得
利事。是故多事之間。易得利事。省事之間。多得害事。由是觀之。與
其以省事因循。單靠一事。較不若多事之中。拔擢一事。掣二事相
較。孰是孰非。孰利孰害。不待辨。亦知多事中。拔擢而來者。是爲利
事。此所謂允執其中者。所以今世之擅利權操勝券。若西人者。不
但無一不從多事中得之。若夫被鞭笞。遭驅策。如近世之破國亡
家者。亦無一不爲苟且偷安。因循省事由致。此係大較其常。非細
論其變也。所以彼知多事之利者。每於一事未了。則又生心再謀

許多他事。若夫受省事之虧。而又無所不虧者。則又不但因省一
事受虧未了。復任許多他事接連受虧。間或有示之以方畧。驗之
以徵據。說之以利害。奈彼將是按步就班。絕不稍一更張位置。以
謂省事。自可相安於無事。孰意自佔省事之虧者。正所以益彼多
事者之利。詎非省事較不若多事之爲利哉。或有不盡然者。亦不
能不再一申論及之。如日報由來。初爲中國所無者。惟自通商以
後。步武西法。方有是舉。始由西人創行於祖界。今卽借西人爲名。
凡遇通商巨鎮。沿海碼頭。幾乎無地不有。雖然行則行矣。多則多
矣。何西人不效中法。不行日報。乃獨吾人必效西法。仿行日報。此
其間豈非明知日報裨益。在能移風易俗。輔政佐治。誠如是。詎非

亦欲於多事中。求一利事乎。乃一經仿行。則大反其道。何則。泰西法制吏治所以善者。除教化功用之外。則首推日報爲鉅擘。因主是稿者。必通經達權。鉄回無私。直言不諱。然後能膺是職。而購閱者又皆取其智識廣大。立論沉着。其所以能致化行俗美。繼絕舉廢。治亂持危之功效。舍日報則不能爲功。所以然者。由其俗無苞苴之獻。情忘嫌怨之隙。乃一朝行於中國。除夫新聞細故。無關急要也者。外此凡愚繫重風俗政事。與夫戰爭艱巨之論。不但阿諛曲護。委婉趨世。其於世道人心。毫無所益。甚於受聘坐探者。一經派出他駐。威儀赫奕。不減微行巡案。因其挾刀筆之鋒利。持是非之顛倒。所到非奔走官場。便夤緣同鄉。不是要挾乾修。便是鑽營

保舉。其於民間也。不是刁禍主唆。便是包覽詞訟。吏畏其刀筆。民懼其長舌。因是或供之以節禮。或送之以年儀。更有一等賤甚於強丐者。逡巡轅門之外。徘徊水牌之邊。今日見人奉委得差。明日發門道賀送扇。此必酌差委之優劣。酬賀金之厚薄。彼則寓褒貶之輕重。報苞苴之多寡。所以地方受坐探戕賊。時有煩言。或有好事者。艷羨其出息。彼反怨言曰。小見多怪。使君不幸僻處荒陬。區區所入何足挂齒。但使鑽營衝要。安患乎不入樓閣。出輿馬。席豐履厚哉。嗟乎。西人苦苦多事。創行日報。所求在利民益世。一經吾人踵行。則反爲賊民弊端。豈所謂法立弊生。所以賢者規人緘口省事哉。是亦不知積習難返。良非鼎革政教。則無以爲也。當此物

